

## *ASO LULU, 22 IUNI 2022*

*Na toe faaauau Taulumaga a le Fono Aoao Faitulafono i le itula e 5:59 i le afiafi.*

*Na toe faaauau felafolafoaiga i luga o le faitauga faalua o le Tulafono Tau Faaofi o le Faatatauina o Tupe Faaopoopo (Nu.2) 2021/2022 & Tulafono Tau Faaofi o le Faatatauina o Tupe 2022/2023.*

**FOFOGA FETALAI:** Ou te faasilasila atu ua toe amatalia nei Taulumaga a le Fono Aoao Faitulafono.

I le toe faaauau ai o a tatou galuega i lenei afiafi, e faataatiaese a tatou Taulumaga i le itula e 1:00 i le aoauli, o lo o saunoa le Afioga i le sui usufono mo Aana Alofi Nu.1. O lea ou te tapa ma le faaaloalo lau Afioga i le sui usufono mamalu, tulai mai mo le faaauauina o lau saunoaga.

**Tofa FESOLAI APULU TUSIUPU TUIGAMALA:** Faafetai i lau Afioga i le Fofoga o le Maota lau Afioga i le Fofoga Fetalai mo lou avanoa i lenei vaega o le afiafi.

Lau Afioga i le Fofoga Fetalai, e malolo le tatou Fono i le aoauli nei ae le i uma se manatu ma se lagona o lenei itumalo o Aana Alofi Nu.1, o lo o gata mai lau tautalaga i le Afioga i le Minisita o Faatoaga ona o se talosaga ma se tuualalo, ia alofagia le talosaga atu i lana Afioga, o se palau mo lou itumalo mo faatoaga. O lea la ua tali le Afioga i le Minisita, o le a taoto atu i sona finagalo aua foi le faamoemoe o lou itumalo, atoa ai ma se vaafagota aua le lumanai o lou itumalo ia a o se lumanai manuia o Samoa mo a taeao.

Ona oo mai ai lea o se tala a lenei itumalo i le Minisita o Galuega Tetele, lau Afioga i le Minisita po o lau Afioga i le Fofoga Fetalai e tauala atu ai se lagona vaivai o lenei itumalo, e le umi foi se manatu i ia tulaga, a o le manatu maualuga e tuitui pea le faitotoa i lau Afioga i le Minisita o Galuega Tetele i nisi o auala o lou itumalo e fia faaleleia, e pei ona taua i le taimi ua sola ma le taimi ua alu, ona o le agaga maualuga, ua fai sina faaletonu o auala ia e kolosi i totonu o lou itumalo, ia e manaomia le fesoasoani i lau Afioga i le Minisita ma Galuega Tetele, ia aua le toe faaleleia, atoa ai ma auala galue o lou nuu, e faapena ona tatalo atu i lau Afioga i le Minisita mo se taimi e faatino ai ia faamoemoe.

O le tatalo atu lea i lau afioga i le Minisita, atoa foi ma le suavai o lo o i ai nisi o lou itumalo e le i oo i ai le vai. O le taimi nei, o lo o totogi pea le vai e le mamalu o lou itumalo e o e faatau mai le vai aua nisi vaega o lou itumalo. O le ala lea e tatalo atu ai ma le agaga faaaloalo i lau Afioga i le Minisita o le Suavai, ia alofa mai i nisi o vaega o lou itumalo.

Ona oo mai ai lea o se tala i le Afioga i le Minisita o Aoga, e tatalo atu ma le agaga faaaloalo ua uma ona avatu se agaga vaivai...

**Tofa Hon Olo Fiti Afoa Vaai:** Lau Afioga i le Fofoga Fetalai...

**FOFOGA FETALAI:** Ia, malie le sui usufono mamalu se i tulai mai lau Afioga i le Minisita o Galuega Tetele.

**Tofa Hon Olo Fiti Afoa Vaai:** Na o sina mea laitiiti lava lea e faamanatu atu ona o lea foi ua toe taua mai le tulaga o auala galue. E faamanatu atu ai i tatou sui usufono mamalu ina ne i toe afea mai lenei Matagaluega i auala galue. O lenei ua i ai le faiga fou e pei ona tofa i ai le Ofisa o Tupe ma le Kapeneta, ia o auala galue lenei ua tuu atu i lalo o poloketi a itumalo, lenei e taua o farming access roads. A o access road a foi ia e alu ese mai ma le main road agai i mea o lo o papaaao ai le mamalu o le atunuu, o i ina e au i ai ma gata mai ai le auaunaga a le LTA. Ma le faaaloalo.

**FOFOGA FETALAI:** Malo faafetai, atonu o lea ua manino lea vaega lau Afioga i le sui usufono mamalu. Faaauau mai le saunoaga.

**Tofa FESOLAI APULU TUSIUPU TUIGAMALA:** Faafetai i le saunoaga malamalama i lau Afioga i le Minisita o Galuega. Ia, o le a lau atu pea i lau Afioga faapea foi le LTA e tusa ma ia fuafuaga. Ou te manatu o le a ou see ese ma lea vaega ae see atu i le Minisita o Eleele o Samoa.

Ia, e i ai le manatu maualuga ma le agaga faaaloalo, o le faamoemoe o lou itumalo o lo o i ai i le taimi nei aua foi le faaleleia o Ofisa ma tulaga faapena. E i ai le agaga maualuga e auala atu i lau Afioga i le Fofoga Fetalai, i eleele o lou itumalo, o eleele a le Malo. Ae i ai le agaga maualuga ma le agaga faaaloalo e tatalo atu, e 250 eka lea a le Malo, e tatalo atu ma le agaga faaaloalo, pe mafai mai se 50 eka e lisiina e lou itumalo aua le faaleleia o le Ofisa a lou itumalo ae le gata i lea, e tilotilo mamao i ni malae taalo o lou itumalo e fai ai ni malae taalo po o se malae lakapi, o malae tenisi, o malae e fuafua uma faapena i eleele ia a le Malo. E tatalo atu ai ma le agaga faaaloalo i le Minisita o Eleele, ia alofagia le talosaga a lenei itumalo, pe mafai ona faamatuu mai nisi o eleele ia a le Malo aua le Ofisa Tutotonu a lou itumalo aua le tatou poloketi o lo o i ai nei. O le agaga maualuga e soso atu pea i lau Afioga i le Fofoga Fetalai aemaise o le faafofoga a le Minisita o Eleele, e i ai le manatu maualuga o lou itumalo, ua 4 Nofoga a sui

usufono, o le latou tala e le i mafai i le vaega lea. A o lea la sa ou tau i ai i lou itumalo, e mafai ona fai, e le faapea e le mafai ona fai e le sui usufono lenei, e mafai ona fai e le sui usufono lenei, e tauala atu i le Minisita o Eleele o le tatou Malo, pe mafai ona faamatuu mai ia vaega se 50 eka aua le atinaeina o lou itumalo, e ala i le faiga o le Ofisa, o mea uma lava, o le Ofisa Tutotonu, ia afai foi e uma lou taimi, a o la e aoga mo le isi sui usufono e faaauau ai le galuega i totonu o le matou afioaga.

E le toe umi foi se tala ma le agaga faaaloalo vaeatu lau Afioga i le Fofoga o le Maota. Ia, o le agaga faafetai i lau Afioga i le Minisita o Tupe, faafetai mo le Tala o le Tupe o lenei tausaga. E i ai le agaga maualuga, malo le onosai, malo foi le faatoatoa i lau Afioga i le Minisita, malo foi le lavapapale, aua lava le faasoasoina o tupe a le tatou Malo aua le lumanai manuia o Samoa mo a taeao.

Ia ona faaiu atu ai lea o se tala a lenei itumalo, e manumanu lava i le tatou taimi. E momoli atu le agaga faafetai i lau Afioga i le Fofoga o le Maota, lau Afioga i le Fofoga Fetalai mo lou avanoa. Faafetai foi i le tapuaiga mamalu a le Palemene i ona tulaga faalupeina. Ae avea ia lenei taimi e faamaualalo atu foi ma faamalulu atu pe a ua i ai se gagana ua sala i la outou faafofoga ia malu ave i fale i lo outou finagalo.

Ia lou itumalo, malo le tapuai, malo foi le faatoatoa, le mamalu i Aiga ma le Faletolu aua la outou tapuaiga a o alofaiva la outou auauna aua fonotaga a le tatou itumalo. E avea foi lenei taimi vaeatu le faafofoga, ia faamaise atu ai i le Susuga i le alii faifeau Metotisi o le matou itumalo, ia faamaise le agaga o le Atua aua le valaau paia a le Atua i lau susuga i le alii faifeau ma le mamalu o le Matagaluega, aua o ia sa lagolago malosi i lenei faamoemoe a o lea ua tuua le malo. E momoli atu ai alofaaga i lo matou tina o le galuega aemaise lou matou itumalo ma lana tapuaiga. Faafetai tele ma le agaga faaaloalo.

**FOFOGA FETALAI:** Ia ua faamalo saunoa i lau Afioga i le sui usufono mamalu mai Aana Alofi Nu.1. Faafetai foi mo lou finagalo faaalua aemaise foi o ni faamoemoe aua le agai i luma o le itumalo. O lea ua faafofoga atu ma le totoa le paia o le faigamalo, ia faapena ona maua ai se fesoasoani mo le itumalo. Ae malo faafetai faasoa, malo foi mo le lagolagoina o le tatou Tala o le Tupe. Malo faafetai.

Ia, o le avanoa lenei o se tasi o sui usufono mamalu. Ia, o lea ua matau atu o lea ua fou mai le sa o se tasi foi o alii Matua o le Maota mai Aana Alofi Nu.2, lau Afioga Aiono Tile Gafa, ia, o lou avanoa lenei. Ma le agaga faaaloalo.

**Afioga AIONO TILE GAFA (Aana Alofi 2):** E momoli atu le agaga faafetai i lau Afioga i le Fofoga Fetalai mo le avanoa foi o lenei sui usufono ma le usugafono a o le tapuaiga foi a lenei itumalo o Aana Alofi Nu.2. E

lelei lava le soosoo o matou, o Aana Alofi 1, ia sosoo atu ma matou aua le faamoemoe o le Palemene ma le Tala Faatatau o le Tupe.

A o le i oo se faamatalaga e tusa ai ma le tala Faatatau o le Tupe ua taoto nei i lumamea i le Laulau-a-Fono a le Palemene, e muamua lava ona ou faatulou i le paia o le Maota, le paia o le Palemene a Samoa, lau Afioga i le Fofoga Fetalai, o lo o tatou tapuaia foi faiva sii i le tai o le Afioga i le Tamaitai Palemia aua le autovaa atu i nuu ese ma atunuu e mamao aua fonotaga, le paia foi aua le Kapeneta. Le paia aua le saofaiga o Minisita Lagolago. Le mamalu foi o lenei talaga aua le Sui Taitai o le Itu Agai ma le mamalu o sui usufono. Le paia o le Maota aua le tapuaiga i le la talaga, o Ofisa Sili o Pulega o Matagaluega ma Faalapotopotoga a le Malo. Fai mai le agaga o le Atua, lea ua gagaifo le la, ia viia le Suafa o Ieova, e afua mai i le mea e alu ae ai le la, e oo atu i le mea e goto ai.

O le a fagatonu le malama lau Afioga i le Fofoga Fetalai, o la ua taoto upu a le atunuu, pe oo i ai sau tala, o Samoa o le atunuu tofi, ua taoto a o se ia mai moana, i lau faafofogaaga i lenei afiafi, ia, e pele i le agaga ma le loto le atunuu. Fai mai le upu o le Tusi Paia le Salamo a Tavita, “E afua mai mauga le manuia o le nuu.” O le Maota lenei lau Afioga i le Fofoga Fetalai, o le mauga, o le mauga lea na saunia e le Atua mo Samoa. E afua mai mauga le manuia o le atunuu, lea o lo o tatou soalaupule nei i le manuia o Samoa. O le tofa liliu ma le finagalo sauoooo o le paia o le Maota, lea tatou te talanoa i ai i le vaitau lenei. O le manuia e tafe atu i le atunuu, e amata atu iinei. Aisea? E afua atu i mauga le manuia o nuu. Ioe. Lale o lo o faatali Samoa, lale o lo o ee papaaao le paia o le aufaigaluega. Aisea? Se i talia lupe o maunu pe iu i fea, pe tua ma ni a le faatofalaiga aua le faasoa tatau aua le tamaoaiga o le atunuu. A maea, e faapena ona faasoa atu.

Lau Afioga i le Fofoga Fetalai, o le agaga lena, o le tatou galuega na tofofi i tatou e le Atua tatou te omai iinei tatou te fuafua tatau ai le manuia o si o tatou atunuu. O lenei vaitau, e tulaga ese le tatou faigamalaga i le lalolagi lenei, e le o po se silafia. Ua tatou i ai i le vaitau o faigata, ua tatou i ai i le vaitau o tofotofoga ma faafitauli, lea ua feagai tonu lava ma le tatou taimi. A o le vaitau e luitau ai tatou. Lau Afioga i le Fofoga Fetalai, o le fuafua tatau, o le ola fuafua tatau e faa-autu i ai sau upu, leaga o le tamaoaiga e le faigofie. O le tupe e le o se mea e mauagofie.

O le fuafua tatau i se lagona ma se manatu, e oo lava i aiga ma fanau, e oo i le lautele o le atunuu e ofi ma talafeagai i ai le lagona lea, leaga o le vaitau lenei ua faigata. O le tatou i ai i le vaitau lenei lau Afioga, ua taugata le olaga, ua taugata le soifuaga. O le lalolagi ua matua maualuga le tau o mea uma a ua maualalo le tulaga o le tamaoaiga, ua pau maualalo. E leai lava se atunuu o sao mai ai, e oo lava i atunuu tetele o lo o faapena ona maua ua pau le tamaoaiga. Ae a fua la i si o tatou atunuu itiiti ma le faatauvaa ona le faatusalia lea. Ona tele lea o le tatou vaai i le va ma le eseese ua tatou i ai i lenei vaitaimi, e fai o faamai, e fai o taua, e fai o le siitiaga o le tau o oloa,

siitia le suauu ma le penisini, ioe. E le faigofie. A o se faamatalaga, o le olaga fuafua tatau lea e i o tatou aao ma o tatou lima. Le Palemene, o lo o faatali le atunuu, o lo o vaavaai mai Samoa, pe faapei ona tatou taitai le atunuu. E faapefea ona tatou tausī Samoa ma ona tagata. Le manuia lea e i outou aao ma o tatou lima. A valetuulima, talofa, a manuia, viia le Atua. O le agaga lena lau Afioga i le Fofoga Fetalai o lenei itumalo. E i ai auala, e i ai metotia, o la e ua i o i le la Itu o le tatou Faigamalo, ioe, ua tofia e le Atua e taitai le tatou atunuu, a o le tatou sa e fautele. A valetuulima foi le tatou faigamalaga pe tua ma ni a, e leai e le palasi na o lena Itu, e aafia uma tatou ma le Maota leni i le tatou galuega. Tatou omai iinei e faitulafono, saili, fuafua tatau le tamaoaiga ma fuafuaga fai aua le atinae o le tatou atunuu.

Lau Afioga i le Fofoga Fetalai, o lenei itumalo, e tasi lava le nuu, e tasi lava le nuu. E pei ona maua i le saunoaga a le Afioga i le Minisita o Faatoaga aua le tulai mai o le Afioga i Aana Alofi 1, e faapena foi. Ioe. E lagona le agaga faafetai, faafetai i le Malo, e faigofie lenei itumalo.

E muamua ona fai atu sau tala lau Afioga i le Fofoga Fetalai i tulaga o lo o i ai lenei vaitau i e faamai, o la e faafofoga mai le Afioga i le Minisita o le Soifua Maloloina. Ua tatou i ai tonu lava i le vaitaimi sa tatou mumusu tatou te oo mai i ai pe sa tatou manatu tatou te le vave oo mai i ai. A ua a nei? Lea ua tatou ola faatasi ma le Koviti. Ioe. Sa tatou vaai mai i ai i na tausaga po o le a le taimi. Sa tatou tapena, sa tatou sauni, ioe. O lea ua tatou oo mai i ai. E ui lava ina ua aafia le tatou atunuu, e le tatau ona gata ai i i, e le tatau ona tatou nofoai, e tatau ona tatou tapena. O lea lava e matau, o lo o faapena. Ae leaga e le na o le Koviti-19, o lea o lo o i ai isi vae o le tootoo o le Koviti-19, ioe, o lea o lo o agai mai. E tatou te le iloa foi le taimi ma le ituaso, a o le tuualalo lea a lenei usugafono ma lenei itumalo lau Afioga i le Fofoga Fetalai i le faafofoga mai a le Afioga i le Minisita ma le Malo, o faapei i ona tatou tapena? O lea ua tatou tapena o lea lava ua tatou ola faatasi ma le Koviti-19, a o isi faamai, o isi faamai ia e fou mai. Pe tatou te alu ai lava i le aluga lea o lo o i ai. O le vaega lea ua tatou lavevea ai e faigofie, lea e maua e faigofie le faamai lea, ae leai lava se mea e faigofie lau Afioga. O lea ua 14,000 i le 15,000 le au pesia, e le o mautinoa foi le au maliliu, ae fai mai le faamatalaga, e feoloolo le malosi o le faamai lea. O lona uiga a fua i isi faamai ma isi vaega ia e mulimuli mai, ia tailo i ai i se tapenaga tatou te gafatia ai, gafatia ai e le tatou atunuu. O le tatou atunuu o le atunuu e limavaivai, e le lava a tatou falemai e le lava tulaga faapea aua le tatou atunuu. Ae lelei lava lau Afioga i le Fofoga Fetalai e ala atu i le Afioga i le Minisita, e lelei lava le oo mai o ia puapuaga ma ia faalavelave, a o lo o tatou mataala pea ma tapena aua le taimi faigata faapea.

E tasi lenei... ua maua i saunoaga ma finagalo faaalua o nisi sui usufono, o le Matagaluega leni e numera tasi i le vaai, a o lea ua matua afatia lava i leni vaitau, o le soifua maloloina. Ioe. Ua matau atu, faafetai o lea o lo o lava le seleni e tapena ai ma fai ai fuafuaga. A o le faaauauina ma le toe

faaopoopoina o fuafuaga fai aua le puipuiga, ia o le agaga lena e talanoa atu ai ma le agaga faaaloalo.

Sa maua lo matou itumalo i le falemai i Leulumoega, e aofia mai ai Falelatai, o Lefaga e oo mai i Leauvaa, e tele le kava a le falemai i Leulumoega. O le polomisi lea na fai, a tulai mai ua fafaga falemai ia, tausii falemai ia. O lena ua ou fai atu lau Afioga, o lena e faafofoga mai, ae talia pea, talia pea, atonu o i ai lava le fuafuaga ma se taimi aua gasegase e tusa ma fuafuaga ma polokalame faataotooto a le tatou Malo.

Oo mai i le Minisita o Aoga lau Afioga i le Fofoga Fetalai. Lau Afioga i le Minisita o Aoga, malo faafetai. Faafetai, malo galulue. O lea ua taoto mai, e ui lava ina itiiti se vaegatupe lena ua toese, ae ou te talitonu foi ua lava tapena lau Afioga aua le faaauauina o polokalame ma tulaga o aoaoga a le fanau, aemaise o galuega e feagai ai. O lea ou te matau ma ou manatua sa faapea e fai le siiga o totogi o faiaoga, ioe. Na ona ou tuualalo lava, faamolemole lau Afioga po o afea e tatau ona tupu ai lea mea.

O le tulaga i tupe aua tatou taaloga, ia o lea ou te vaai atu e leai lava ma se tupe o alu i le Iuni Lakapi, o lea e i lalo ifo le tulaga o fesoasoani i atinae o asosi eseese o taaloga. Ae i ai lava lau tala lea e fia fai atu lau Afioga i le Fofoga Fetalai. Ua ala ona ou fai atu, manatua lava le mea lea, faatoa foi mai nei lava alo ma fanau a le tatou atunuu sa o e tauave ma avefua a le tatou atunuu aua le lakapi, Au Taitoafitu. Ua ou manatu, i le tulaga aloaia, avea ia lenei taimi e faaleo ai le agaga faafetai o lenei itumalo, leaga o lea e Kapeteni ai se alo ma se fanau, faaleo le agaga faafetai i le Pulega a le Au Taitoafitu, le Susuga i le Faiaoga ma lona lagolago ma le Pulega. Ua maualuga le tulaga ua oo i ai le tatou au. E talitonu foi e le i mamao atu, o le a le leva o le afiafi, e talitonu sa faatali uma le tatou atunuu ma tapuaia faiva o tatou fanau. A o faafofoga mai lau Afioga i le Faiaoga ma le Pulega, o outou mama na, o outou mama na, o lea toe tasi le vae o le taamilosaga, toe o Amerika. Ia, o le tatalo, pe a tusa ai lau Afioga i le Coach ma le Pulega, o le tatou ipu le ipu lena, ioe, e faaiu i ai le taamilosaga ma vae o le Taitoafitu a le lalolagi, ia taumafai ia outou omai ma le ipu lena mai Amerika ma tatou. Ua siitia la outou taumafaiga.

O nisi vaega lau Afioga i le Fofoga Fetalai, e pei lava ona muai fai sau faamatalaga i le tulaga o le siitia o le taugata o le soifuaga, penisini. Sa ou talanoa i le isi faitaavale, fai a tala ua matua leai lava ma se tupe e maua. O le pasi e alu uma lava le tupe e totogi ai le penisini o le pasi, o le avetaavale, o le taxi, leai se mea e maua, ona o le manatu i le atunuu. E leai se polofiti e maua i ia mea, taugata o le soifuaga. O lea ua tatou iloa nei e leai lava se vaega e le i oo i ai le siitiaga. A o le agaga lena o lenei usugafono, ola fuafua tatau. Ia tatou ola e le gata o lea ua saunoa ma aumai le finagalo, tatou ola faatasi ma le Koviti-19, tapena foi tatou, tatou te ola i le olaga lea ma le soifuaga lea ua i ai, e ui lava ina le i faigofie, ae le mafai ona tatou toe alo ai. Ioe. O a faalavelave, o lea e faafofoga mai le tatou atunuu, aua ne i toe

faa-faigataina ni faalavelave. E ala ona tigaina o tatou, ioe. E oo i taumafa, e oo i tulaga faapena, e tatau ona tuutuu i lalo. Afai sa ta ola i le \$500 i le vaiaso, e tatau ona taumafai e ola i le \$300. Ola fuafua tatau. Ola fuafua tatau. O lea ua matau mai, o le tamaoiga o le tatou atunuu, ua pau laitiiti i lalo, a o lea lava e matau, o lea lava e taumafai ina ia sologa lelei ma sologa manuia le tatou atunuu i mea uma, mea eseese e fai. E momoli le faafetai i lau Afioga i le Minisita o Tupe aua le galuega faigata ma le galuega fita i lau Matagaluega.

Ona oo mai lea i lou itumalo, lau Afioga i le Fofoga Fetalai, o la e faafofoga mai le Afioga i le Minisita o Galuega, ua uma foi ona ou oo atu ma feiloai i lona ofisa. O au ou te musu tele ae ou faalavelave soo. Sa sauva foi i sau faamatalaga i lau uluai lauga lea na faaleo atu i luma. O i ai le matou auala galue lea i si ou pitonuu, i ou tuafale, o lo o toatele aiga i uta lau afioga. Leaga o la ua pei ua amata mai uta le suaga, ae le o taitai ona oo mai i tai. E tatalo atu ma le agaga faaaloalo se i e alofagia le auala lea e alu i uta i le matou pitonuu lea. A lava lau faasoa se taimi foi avanoa o lenei tausaga, o lea ua tatou talanoa i le Tala Autu o le Tupe.

O lau Afioga i le Minisita o le Siosiomaga, o lena foi ua uma ona tatou feiloai ma lou tama faifeau. E faafetai o lea ua oo atu le tusi ua tali atu. Ae i ai le isi vaega o le matou pitonuu, e pei lava ona ou talanoa atu muamua, o le taufusi lea o lo o i le ogatotonu o le matou pitonuu. A silasila lau afioga ma le paia o le Maota i le taufusi lea, a oo ina sua, e matua leaga faia uma nai aiga la e i ai, e matua lolovaia uma o latou maota. Ua ese nei aso ese la aso, sa le faapea. E goto uma i i, ma toa uma i i le vai e sau mai uta, leaga e pei e omo i lalo. Lau Afioga o la ua fai atu le aualatele, ae ou te talitonu, ou te iloa e le aafia tulaga ia i le taufusi lea vaeatu le paia o le Maota. Ou te tatalo atu lau afioga i le Minisita, se i e alofa mo se.... a oo ina leaga le tau, ia lena ua ou fai atu, e le o se mea lelei, fai o le faamai, o le manogi, tulou, ou te alofa i nai nei aiga o lo o siosio ai autafa o le taufusi lenei. Ia alofa mai, sa ou faapea ou te tatalo atu lava ona e le i oo mai le auala, ae o lea ua sau le galuega o le faaleleia o le aualatele i sisifo, ae o le a se togafiti o le a se fesoasoani lau afioga, aua lea galuega e fia faaleleia o si ou itumalo.

Ou te talitonu e fua foi le tatalo i le faasoa lea e taoto ai i le Malo. E fai fuafua foi le talosaga, o isi lava mea uma, o le matou vai, ou te iloa a fai atu le matou auala, le auala lea i uta i le matou pitonuu e pei ona ou tatalo atu i le Minisita o Galuega, ona mafai lea ona... pe a tusa ai o le faaauauina o le matou paipa lena. A o le faasoa lava o le measili lena ma taua, ola fuafua tatau, o galuega ma mea e fai aua lo tatou atunuu ma lo tatou Malo.

Lau Afioga i le Fofoga Fetalai, e pei ona ou fai atu e le umi foi se tulai a lenei itumalo ma le tatalo atu ma se manatu foi aua le Tala o le Tupe. E tele lava mea sa fia faaleo, ae leaga o lea ua saunoa ma pau le afioga i lau afioga i le Fofoga Fetalai i mea taitasi, ia taoto mo se isi taimi. A o le tulaga lautele e taumafai atu ai se leo, o lenei usugafono ma lenei itumalo. Ia tau ina

faamanuia le Atua i lenei Palemene, faamanuia le Atua i le Taitai o le atunuu ua toesea, ia alu alu sau se taimi sau se aso, foi mai ma le manuia i fanua i le tatou tapuaiga.

Lau Afioga i le Sui Palemia ma le vasega o le saofaiga aua la outou fola i luma i Minisita, o outou mama na, o la outou galuega e tulimatai i ai le vaai a le atunuu. E pei ona ou fai atu, o outou o tatou uma na, a lelei ua tatou lelei uma, aua ne i faapito tasi la outou silasila, ae silasila aua le tatou atunuu. E faapea foi le lagolagosua ma le tuualalo aua afioga i Minisita Lagolago, ia faamanuia le Atua, o la outou vasega foi, a outou lelei ua lelei foi le Kapeneta. Manuia foi lenei Itu aua le Afioga i le Sui Taitai ma sui usufono mamalu o lenei Vaega Faaupufai, ia faamanuia le Atua. Ia faamanuia le Atua i le saofaiga i le mamalu o Ofisa Sili o Pulega o Matagaluega ma Faalapotopotoga a le Malo, maua lo outou soifua laulelei, maua lo outou malosi, onosai i le tele o feau ma galuega, e tautua ai lo tatou atunuu. Lau Afioga i le Loia Sili, ia faamanuia le Atua, ia manuia ou faiva. Lau Afioga i le Fofoga Fetalai, faamanuia le Atua, faatumu e le Atua lau utu, aua le taitaiga o le Fonousu a le atunuu. Ia manuia foi le Failautusi ma le sui Failautusi, ma le mamalu o le Ofisa. Ia manuia le tapuaiga a Fasitoo-uta le tatou itumalo, le paia i le faafeagaiga, Uta, malo le tapuai o lena ua fai le tatou lotu afiafi, ou te iloa o lena e talosia mai. Ae ia manuia le tapuaiga a Satuala ma Falefitu ma Tauau, aemaise foi o ekalesia ma faafeagaiga eseese, ola so matou leo, viia le Atua faafetai.

**FOFOGA FETALAI:** Ua faamalo faafetai saunoa faatamalii i lau Afioga i le sui usufono mai Aana Alofi 2. Ou te talitonu foi i tulaga o saunoaga ma tuleiga foi, malo faafetai fautua. O se fautuaga lelei foi mo le agai i luma e le gata i le tatou Palemene ma le taumafaiga foi o le tatou Malo, ae ua ooo foi i o tatou aiga ma nuu o faafogafoga mai. O fautuaga ia o lea e avatu i le Maota o Taitai o le atunuu, aua lava lenei vaitau. O le taimi foi ua tatou pagatia i lenei vaitaimi ona o mea ua i ai le lalolagi. Ua malo tofa, faafetai foi le silasila mamao aua le agai i luma o le tatou atunuu.

O le avanoa lenei o se tasi o sui usufono, ua avanoa foi lo tatou Maota. O lea ua matau atu o lea ua fou mai le sa o le sui usufono mai Falelatai ma Samatau. O le taimi lea le sui usufono mo lau saunoaga.

**Afioga LUPEMATASILA GALUMALEMANA TOLOGATA TOGIA TILE LEIA (Falelatai & Samatau):** E faafetai i lau Afioga i le Fofoga Fetalai mo le avanoa mo lenei foi itumalo o Falelatai ma Samatau, e fai ai foi se sao aua le lufilufiina o le tamaoaiga o le tatou atunuu, e pei ona i luma nei o le Palemene.

E manatu ua mou atu le fetu o le taeao, ma ua mou atu ai ma le malamalama o le Atua, a ua fotuai mai le pogisa. Ua tatou i ai foi i lenei afiafi i lalo ifo o lenei Maota i le malamalama o le moli e alu i le eletise, o le moli e faia e le



tagata. Ae ou te faapai atu i le paia maualuga o le Maota, i le afio o lau Afioga i le Fofoga Fetalai, ua le nofoia foi le Nofoa o le Sui Fofoga Fetalai, tatou tapuaia lana sailiga togafiti i mai o le tino.

E faapai atu i lenei Itu o le Maota, ua le nofoia foi le Nofoa o le Palemia, tatou talosia foi le latou faigamalaga. Ia afio lau Afioga i le Sui Palemia, afifio le paia maualuga o Minisita o le Kapeneta, afifio a outou afioga i Minisita Lagolago, afifio foi Ofisa Sili o Pulega o Matagaluega ma Faalapotopotoga a le Malo, o lo o vae ma lima i ai lo tatou Malo. Susu foi le Failautusi, le sui Failautusi ma le Ofisa o le Fono. Ia oo mai i lenei Itu o le Maota, e le o nofoia foi le Nofoa o le Taitai o lenei Vaega Faaupufai. A o lea e afio atu le afioga i le Sui Taitai ma sui usufono o lenei Itu o lo o agai lo tatou Malo.

E manatu lau afioga o lea ua uma ona e toto le taamu teevao, aua lo tatou vatapuia ma lo tatou Tapaau Sili i le lagi i le malama ua sola. Ia tau ia ina ia logo malie i le faafofoga a lo tatou Tapaau i le Lagi le taulaga ua siitia. Ua maea foi ona e faatagisia le alofa o le Atua ina ia auai faatasi ma i tatou a o faagasolo le tatou Fonotaga i lenei aso.

Lau Afioga i le Fofoga Fetalai, ona ou oo mai lea i le Tala Faatatau Autu o le Tupe tausaga faaletupe 2022/2023. E manatu e pei ona malie i lau saunoaga lau afioga i le Fofoga Fetalai, ia manaoga o lenei itumalo ua maea ona tuuina atu i le tausaga ua tea, e i ai la le manatu matou te le toe aloina le ogasami lea, aua o lea foi ua uma ona fai tusi ma molimoli atu i afioga a Minisita, e taumulimuli ai ma taalogologo ma faamanatu talosaga a lenei itumalo.

Lau Afioga i le Fofoga Fetalai, ua faaulutalaina le Tala o le Tupe i lenei tausaga ua faapea mai, folau faatasi e faamaite le faatupulaia o le tamaoaiga ina ia mausali mo le manuia o Samoa. E momoli atu le agaga faafetai tele i le Afioga i le Minisita o Tupe faapea foi le Ofisa Sili o Pulega a le Matagaluega ma le aufaigaluega a le Ofisa o Tupe, aemaise o Ofisa Sili ma le aufaigaluega Matagaluega ma Faalapotopotoga a le Malo. O e sa fitaituga i le tapenaina ma le tau faasoasoaina o le tatou tamaoaiga utiuti ma faaleauau.

O se faalupega e ese le manaia, ae pau lava si mea lea ua leva ona ou tilotilo i le faalupega o le Tala o le Tupe lenei, o ai e faasino i ai le galulue faatasi? pe faasino i le Palemene? pe faasino i Matagaluega a le Malo? pe faasino i le atunuu atoa? aemaise lava, ai se manaia ae aumai ae faaopopo i ai ma le Atua i i, folau faatasi ma le Atua. Aua o lea foi na misi le Atua i le theme o le tatou tutoatasi, na se i mavae atu nei, folau i le faatuatua. A o le fesili lava lea, e faatuatua ia ai? e manatu lenei itumalo, e taua le fai ma o tatou vaavaai i le Atua, aemaise lenei vaitau, o le vaitau o le lofia o tatou i so o se mala, o faamai faapea foi suiga ogaoga o le tau, aemaise o le fetauai o le lalolagi.

Ona ou oo mai lea i le tamaoaiga, e maua i saunoaga a le toatele o sui usufono mamalu, ua matua afaina lava ma pau le tamaoaiga o si o tatou

atunuu. A o le tulaga lava lea tatou te tautau, ua afaina le tamaoaiga o le atunuu ona o le faamai Koviti-19 ona o le taua o lo o fai i Ukraine ma le tele o isi tuuaiga o lo o tuuai ai. A silasila lenei Maota i le kalafi o le tamaoaiga, na amata ona pau mai le tamaoaiga i le 2019/2020 sa tulai mai ai -2%, faaauau mai ai i le 2020/2021, na matua pau maualalo lava -7.4%. O lea foi e i ai le manatu i lenei tausaga faale-tupe ua taufaaiuiui, o le tulaga foi lea e i ai. Ua fuafua le Malo e toe faatupulaia le tamaoaiga i lenei Tala Faatatau o le Tupe, ua fuafua e 0.6% ua siitia ai. Ua malo le lototetele, aua a fua ma vaai i le tulaga o i ai aafiaga i lenei vaitau, o se toa pe a fai e uma ifo lenei tausaga faale-tupe, tatou te ausia le positive side, ae malo faafetai. O le tulaga e manatu lenei itumalo e ese ona faigata ona ausia le manulauti lea ua tuu mai e le tatou Faigamalo. E muamua, atonu o lea e i ai se vaai a le Faigamalo, o le a siitia a tatou tupe maua i turisi, pe afai e amata ona tatala femalagaaiga i le masina fou o Aokuso. A o le mea o lea e faanoanoa ai lenei itumalo, pe a vaavaai i fuafuaga ua tuu mai i le Tala o le Tupe. E faaititia le paketi a le Ofisa o Turisi. E faapefea ona tatou expect ina le sii maualuga i luga o le tamaoaiga mai turisi pe a tatala a tatou femalagaaiga, ae leai se tatou galuega e fai ina ia faatosina mai turisi.

E leai lava se eseese o le mea lea ma le tamalii e manao i sana ava, pei o tala i aso la. Ae le o ana matai tulafale e sue mai se ava a le alii, e na ona nofonofu, o lona uiga e fiu lava e nofonofu i le fale, e leai lava se ava e maua. E pei e tau faapena la ta vaavaai i le tulaga lea e i ai, ona sa i ai le manatu, e tatau ona ave se tupe tele i le turisi ina ia fai ai faatosina, ia taunuu le miti a lo tatou Malo.

O le tulaga foi lea e vaavaai i ai i tala o le news e aumai e atunuu i fafo. O le vaiaso na tea nei sa faalauiloa ai e le Air New Zealand le siitia ai o pasese i se taimi e le o toe mamao i le 20%. Ae o vaega ia o lea sa avatu ai le tuualalo a lenei vaega i le la foi tausaga. I le lelei o le vaai o se tatou lava vaalele, e le gata ina fesoasoani i le competition, e faataugofie pasese, a o spinoff foi e mafai ai ona manuia isi vaega o le tamaoaiga. Ua maua foi i le faalogo le siitia o le value o le tala Amerika lea foi ua maea ona release mai e le Kovana o le faletupe o Amerika, le ono siitia o le value o le tala Amerika. O lona uiga o le a atili ai foi ona matua afaina lo tatou tamaoaiga, aua o le a laititi le value o le tatou tala. O galuega sa fuafua e faatino, o le a le mafai ona ausia aua o le a laititi le value o le tatou tupe e faatino ai, aemaise lava le tau o le soifuaga. O le tatou fesoasoani sili lava i le taimi lenei, o tupe faameaalofa mai fafo. A na le seanoa tupe faameaalofa mai fafo, o lo o agalelei ma alolofa ai o tatou aiga, ae le o faigofie foi le tulaga o lo o i ai o tatou aiga i fafo i lenei vaitau. E toatele nisi ua faamalolo mai galuega, o nisi ua na o ni nai itula e faigaluega ai. A o le agaga faafetai, o lea lava e susue le faamalama ma tilotilo mai i Samoa, ma lafo mai tupe e fesoasoani i le tatou tamaoaiga. A o lea foi e faalogologo atu, e taofia mo se taimi le tumau, galuega faavaitaimi i le masina fou. A o le tuualalo a lenei itumalo, ia

faaaauu pea. Aua o le taimi lava e taofi ai, e afaina ai foi ma tupe ia faamomoli mai fafo, aua e le o se tulaga lelei o i ai le tamaoaiga i atunuu foi i fafo.

O le tulaga i le lafoga, faatoa se i mavae atu nei ona tatou faamanatuina le 60 tausaga Tutoatasi o le Malo. O le Malo na saili e ni outou tuua ma ni o matou matua. O le Malo Tutoatasi tatou te le toe faalagolago ai, i isi malo o le lalolagi, a o le Malo Tutoatasi tatou te faalagolago ai tatou ia i tatou lava, e ositaulaga ai tagata uma. A fai o lea ua totogi le lafoga a Le Ao Mamalu o le Malo, ua ou manatua ai le fesili a le ausoo ia Iesu, ina ua fesiligia e le autusiupu ma le aufalesaio le ausoo, pe fai se lafoga a le latou Iesu. E fesili atu ia Iesu ae tali Iesu i le fesili, fai mai Iesu, a o ai e fai i ai e tupu o atunuu le lafoga? O ai? E fai e ni tagata ese pe fai i ni ana fanau? Ae tali le ausoo, e fai i tagata ese. O le faamanatu taua lena, lo tatou Malo Tutoatasi lea, na saili e outou tuua ma ni tatou matua, tatou te ositaulaga uma, aemaise lava lenei vaitau.

Ua matauina foi i le Tala o le Tupe le pau o tupe maua a le Malo, o lo o fuafua pe a oo ina aveese mai le traffic mai le Matagaluega o Leoleo o i ai nei, i le Faalapotopotoga a le LTA. O le tuualalo a lenei itumalo lau afioga i le Fofoga Fetalai, se i vaavaai po o fetai le taimi e fai ai lenei suiga. Aua o lea foi ou te taofia se tasi o mau a le Faigamalo, e taugofie atu pe a fai e le Malo, pe provide e le Malo ia service nei, nai lo le tuu atu i tua. Aua o le isi laasaga e sosoo ma le corporatize o le privatize. O popolega ia, ae afai e mafai e le Faalapotopotoga ona maua mai se dividend lelei a le Malo, ia faafetai pe afai o le agaga lea. Aua o le agaga lea sa uunaia ai le tele o Matagaluega a le Malo e avea ma Faalapotopotoga Tumaoti, ina ia aveese le avega mai tauau o le Malo, a ia mafai lava e i latou ona sue a latou tupe ma maua se tupe faasili e toe faafoi mai i le Malo, e service ai le budget lea tatou te talanoaina.

O le isi tulaga ogaoga e pei ona maua i nisi o saunoaga, o lo o aliae mai foi le faamai o le monkey box. E tusa ai ma tala mai le World Health Organization, e le iloa po o a auga o lena faamai, pe alu alu foi sau se outbreak, iu ifo i se pandemic, o le lockdown foi le mea e oo i ai tatou. O nai vaaiga mamao ia e tilotilo i ai, e i ai le lagona e faigata ona ausia le manulauti ua faatulai mai nei.

O lea foi e maua e le i mafai ona ao le 28 miliona o tupe sa tatau ona maua e le Malo, i le tausaga faale-tupe o lo o faamaea nei, o popolega ia.

Ona ou oo mai lea i le mataupu o le taugata o le soifuaga. E pei ona ou fai atu muamua, o le mafuaaga lea po o le tali lea o lea e tuu i tagata, o le Koviti-19 ma le taua la e fai i Ukraine. A o le fesili a lenei itumalo, o lea foi sa ou fesili ai i le tausaga lea ua tuanai atu. O le a se galuega a le Malo o fai? ina ia maua ai se faamama avega i le mamalu o le atunuu. E na ona ou faapaulapula atu, ina ua amata ona fotuai mai le faamai 1920-2021, sa faa-tuusaunoa e le Malo i lena vaitau, le tiute o nisi o oloa. O i ina sa maua ai le

faamama avega ma pau maualalo ai le inflation. O le taimi lenei, e le o se mea lenei ua tatau ona fai e le Malo, a o le mea e faanoanoa ai lenei itumalo pe a vaavaai i le Tala o le Tupe, o lea ua faaofi mai le isi lafoga fou, e taua o le sin tax, a faa-Samoa, o le lafoga o agasala. Ae faaee i luga o meaai po o meataumafa o lea e masani ona ola ai le atunuu i aso uma. A fai e le o gafatia e tagata ona faatau le pusa siusiu pipi le pusa mamoe, a o lea o le a toe faaopoopo i ai ma le tax lea o le agasala, o le mea moni, e matua mafatia le atunuu.

**FOFOGA FETALAI:** Ia malie le sui usufono mamalu, ua tatau foi ona faamalamalama le Malo i tulaga ia ona o lea ua oo i ai saunoaga.

**Susuga Hon Laauli Leuatea Polataivao Fosi:** E tumu au i le faaaloalo, ua leva lava ona nofonofo ma matau, e le o se mea lelei foi le seu lauga, ae ua alualu lava, ua pei lava ua tatau ona tali. O le mea muamua, o le upu lea na e saunoa i ai o le faatuatua. O le upu lea faatuatua, e te le toe avea i se isi mea e tasi. E tasi lava le mea e ave i ai lau faatuatua, e na o le Atua. O le fatu lenei na fofoa uma ai le Tala o le Tupe ma fuafuaga uma nei a le Faigamalo. A fai lava la o le sui mamalu ia e 3 pe 4 ni mea o faatuatua i ai, o lona lava lenei finagalo. E felanulanuai le saunoaga a le sui usufono, o le mea lenei o lea na ou tulai atu ai nei, e leaga o lea ua oo le saunoaga e faaupu le tulafono lea ua sau nei. E le o se tulafono o le galuega a le Matagaluega o Tupe Maua, a o lea ua faaupu, o le lafoga o le agasala. Lau Afioga, ua tatau ona faasao upu ia, o le mea lea o le TIM, e le i faia iinei, matou te omai ua uma ona fai le TIM na fai e le taimi o i ina, fesili ane la i le Sui Taitai po o le a le mea na fai ai. O le a foi le mafuaaga na ala ai ona fai. Ae aveese le upu lea, leaga e tuga le upu lea, e leai se tulafono e faia, o se tulafono o se agasala. E le sao lea upu, o le agaga lenei ou te tulai atu. Lau Afioga i le Fofoga Fetalai, aveese e ese le faauigaga a le Matagaluega a le Sui Palemia, e a ia le Matagaluega.

**Tofa Hon Lauofo Fonotoe Nuafesili Pierre Lauofo:** Lau Afioga i le Fofoga Fetalai o se mea e fia faasao.

**Susuga Hon Laauli Leuatea Polataivao Fosi:** Ae pei o le agaga lenei, lafo maia, ua uma le tou taimi, uma tou faiga faavae. Lafo mai laia o le mea o lea se i taumafai atu taumafaiga a le faigamalo fou. O a foi tulaga ia o le femateai e le iloa pe tua ma ni a, na o le Atua na te iloa le mea e tupu taeao. A o le faatuatua lea e i ai, o le faatuatua e tau i manu. O le agaga lenei o lea e tulai atu. Ae alofa tele i le sui usufono. Ua uma uma a sui usufono o le la Itu, e lauga mai lava e ese le matagofie, a o le lauga a le sui usufono lea, ou te le iloa i ai po o le a le finagalo o le Kapeneta. O lona uiga e uma lava lenei Nofoaiga e leai lava se mea e faia i lou itumalo. Ma lou agaga faaaloalo.

**Tofa Hon Lauofo Fonotoe Nuafesili Pierre Lauofo:** Lau Afioga i le Fofoga Fetalai, leaga o lea sa taua au i le saunoaga a le Afioga i le Minisita. E leai, se aua tatou te faimea ita, o lea lava e saunoa le sui usufono ia i lona finagalo, ae faavasega ifo i ina, aua o outou lea e agai atu i ai saunoaga. E leai o le upu lea e saunoa i ai le sui usufono, o la e taatia lava isi vaega o le faatuatua ma isi mau mea faapena, a o lea e sao le sui usufono, o lea foi ou te faitau atu au o lea e aumai i totonu o le lauga a le Minisita o Tupe, [.....]. O lona uiga, e pei e foliga mai o mea o taumafa foi ia e i ai le pia, o le tapaa, o taumafa gaoa, tele le gao. O lona uiga a e taumafa i le siusiupipi ua e agasala. O le a lau sala? O le a taugata le siusiupipi, o le a sii i luga le tau o le siusiupipi. O lau sala lena o lou taumafa fua i le siusiupipi ma isi meaai gaoa.

**FOFOGA FETALAI:** Ia o lea ua maua atu. O lea ua maua atu le finagalo lau Afioga i le...

**Tofa Hon Lauofo Fonotoe Nuafesili Pierre Lauofo:** Ae pei o le tulaga lena, e ave ... aua o le faamoemoe lea ou te vaai atu i ai a le Afioga i le Minisita o Tupe ma le faigamalo, o tupe ia lea ua siitia i lafoga i taumafa nei, e ave se i taumafai ai e togafitia ai le NCDs faamai ia le pipisi ia ua taatele i totonu o le atunuu se i tau aumai ai i lalo faamai ia. Ia e pei o le tulaga lea lau Afioga, a o le timi, ou te le iloa la i ai i le tini lea, masalo ai o le mea foi lele le software lea e togi ai tax lea la e silafia e le Afioga i le Sui Palemia. Ia atonu i se taimi saunoa i ai e faamalamalama ma lena mea.

**FOFOGA FETALAI:** Faafetai. Ia, atonu o lea foi e tau saili atu i le lauga a le Afioga i le Minisita o Tupe le upu lea ua taua e le sui usufono mamalu. Ia atonu se taimi ona faamalamalama lea o lea tulaga ma ia faamanino foi le... leaga o lea ua pei ua faatoa faalogo foi lea i se ituaiga lafoga faapea o se lafoga o le agasala.

**Tofa Hon Lauofo Fonotoe Nuafesili Pierre Lauofo:** Lau Afioga i le Fofoga Fetalai, o le a ou fesoasoani atu, ona o lea ua e fesili po o fea o lea e tau saili i le lauga, o le itulau e 6, lea, i totonu i i mo le silafia.

**FOFOGA FETALAI:** Ua lelei, taatia mai o lea se i vaavaai atu i ai, o se taimi foi saunoa le Minisita e faamalamalama atili le tulaga lea.

**Susuga Hon Laauli Leuatea Polataivao Fosi:** Lau Afioga, o le ala lea o lou tulai atu, e ese lava le sin, ese le agasala. S i n sin, agasala a g a s a l a. O le mea lena o lea e fai atu ai. A tatou talanoa i le faa-Peretania, tulou le Palemene, e le o se tatou gagana. Ae a tatou omai loa i le lavelave o le tatou gagana, ia ona mamafa loa lea. O le mea o le tagata ua tau agasala, ia lena

ua e iloa, e toalua lava na tautau i talaane o le Alii Faaola, ona o le a? O le agasala. Ia pei o le tulaga lena, faaoga mai pea la tatou upu lea na avatu ai, i se taimi ona saunoa lea o le Minisita o Tupe po o le a le mea ua faaigoa ai lea lafoga faapea. Ae pei o le agaga lena ua ou tulai atu, e ese lava le sin, ese le agasala.

**FOFOGA FETALAI:** Ia, atonu o lea ua maua. Atonu o se taimi foi saunoa le Minisita o Tupe e faamalamalama lelei le tulaga lea ma le uiga, a o le mea sili lea ua maua. Ia lau Afioga i le sui usufono mamalu, toe 3 minute o lau saunoaga, ae o le tele lava mea ia ua e saunoa i ai ua uma foi ona tali i ai le Malo, e tai pei foi o lafoga, o vaalele, o le taofi o galuega faavaitaimi, ua uma ona tali le Malo i mea uma ia ua e taua. E manatu foi ina ia agatonu pea le saunoaga i tulaga e ono taua, ae o lea ua matou talanoa atu, ia faauma maia le saunoaga toe 3 ou minute.

**Afioga LUPEMATASILA GALUMALEMANA TOLOGATA TOGIA TILE LEIA:** Faafetai tele i lau Afioga i le Fofoga Fetalai. Ua tele lou taimi ua maumau ona o le faauilavea a le Afioga i le Minisita, ae na pau lava le faamatalaga e fai atu i i le vaega lea, o le atunuu la e faafogafoga mai, e le malamalama le toeaina ma le olomatua i tua pe a tau atu le upu papalagi lea o le sin. Ia, o le ala lena o lea e taumafai e faa-Samoa atu ai le vaega lea ma le faaaloalo. Ae faafetai o le a ou mei ese ma le vaega lea.

E pei ona tau fai atu le pau maualalo o le inflation a o agai atu i le Koviti-19, e tele le galuega a le faigamalo sa tulai mai i lena taimi na fai, sa tuusaunoa lafoga o nisi o meaai taumafa, lea na ala ai ona tele le faamama avega mo le atunuu. O le mea foi lena e tataua ona tilotilo i ai le faigamalo i le taimi lenei. O lo o alalaga mai le atunuu i le taugata o le soifuaga, vaai po o le a se galuega a le tatou Malo e tali i ai i le faafitauli lea e alalaga mai ai le mamalu o le atunuu.

O le tulaga i le eletise, e silafia e lenei Maota o le eletise o le backbone...

**Tofa Hon Olo Fiti Afoa Vaai:** Lau Afioga i le Fofoga Fetalai...

**FOFOGA FETALAI:** Ia se i saunoa mai le Afioga i le Minisita ae se i onosai mai le sui usufono mamalu. Lau Afioga i le Minisita.

**Tofa Hon Olo Fiti Afoa Vaai:** Lau Afioga e matau atu lava ma le totoa saunoaga a le Afioga i le sui usufono faapea o le tuuaia lava o le tulaga o le Koviti-19 ma mea faapena ua mafua ai ona maualalo le tulaga o le tamaoiga faapea foi le tau o le soifuaga. O le tuuaiga ou te iloa e le sao le tuuaiga, ona o lo o aafia uma ai le lalolagi atoa i le tulaga ia o le faamai, aemaise lava la le tulaga lea o le tau o oloa ma mea faapena, ia e afua mai lava i i le taua lea ma ua siisii ai le tau o le suauu, ia ma siisii ai ma tau o oloa mai fafo i le

tulaga lava lea o le felauaiga o oloa i lea atunuu ma lea atunuu. E lelei foi lea pe a ou... ua vave ai ona ou tulai atu, o le 3% o le inflation lena lau Afioga i le sui usufono mamalu, o le afa o le 1.5% o le inflation lena e mafua mai i le felauaiga o oloa ia i atunuu la ia e i ai ma tatou. O le mea la lena, a o le Koviti-19 e mafua ai, e pei o le mea lena e fia faasao. Ae tuu mai lou faatuatua o lea o le a taumafai atu ai le tatou Malo i se tulaga e i ai se taimi ou talanoa i ai i le tulaga e tau sue se auala e tuuaititia ai le tau o tatou oloa ia e aumai mai fafo, le tau o felauaiga o tatou oloa e tau fesoasoani ai i le pagatia o le tatou atunuu. Ia o lo o aafia uma lava atunuu o le lalolagi i lenei vaitau i le mea lea e le na o tatou. Ma le faaaloalo.

**FOFOGA FETALAI:** Ia, masalo o lea ua maua foi le saunoaga a le Minisita ma faamalamalama lea itu i le saunoaga a le sui usufono mamalu. Ia e ao lava ona ou faamalamalama atu le upu lea na taua ina ne i faa... ia foi lele i nofo le malamalama foi le tatou Maota aemaise o le faafogafoga mai a le atunuu, leaga o lea sa lauga ai le Tamaitai Minisita o Tupe. O le faa-Samoa o le lauga a le Tamaitai Minisita, ua fetuunai ma siitia lafoga i luga o oloa e ono aafia ai le soifua maloloina o tagatanuu i faamai le pipisi, e pei o le tinoputa, mai suka ma isi. O le faa-Samoa lena o le lauga. O le faapapalagi – increases in sin taxes in support of the Government’s commitment to compacting non-communicable diseases NCDs.

Ia, o le mea lea ua faatonuina ai ina ia aveese faamaumauga o le upu lea agasala, e leai se upu agasala o i totonu o le lauga a le Tamaitai Minisita, ma o le faauigaga lena o le tulaga lea.

[Upu na faatonuina e le Fofoga Fetalai e aveese mai faamaumauga o le saunoaga a le sui usufono mo Anoamaa 2: *“Sin tax, s i n. O le agasala. A lea e aumai i totonu, lea ou te faalogo atu o lea e saunoa i ai le sui usufono. o le sin, s i n – agasala.”*]

**Tofa Hon Olo Fiti Afoa Vaai:** Lau Afioga i le Fofoga Fetalai, leaga o lea na vavevave talanoaga i le upu lea sin, a o le isi uiga o le upu sin, o le go against i se mea. O lea la e i ai le mea lea pei ona saunoa ai le Taitai o le Itu Agai, o le against i mea ia o meaai gaoa ma mea faapena. A o le isi uiga lena o le upu sin ma le faaaloalo lava.

**FOFOGA FETALAI:** Ia, atonu o lea ua manino ina ia...

**Tofa Hon Lauofo Fonotoe Nuafesili Pierre Lauofo:** Lau Afioga i le Fofoga Fetalai, ua atili ai ona sese le uiga o le upu sin. O la ua ese le faauigaga e Laauli o le sin, a o lea foi ua lau mai i i le faa-Samoa o le sin e

ese foi, a o la e foi ua toe tulai le Minisita o... ia o lea foi ua ese le uiga o le sin. O le sin Olo o le agasala, o lena e te malamalama lelei i le agasala, agasala Olo.

**Tofa Hon Olo Fiti Afoa Vaai:** Lau Afioga i le Fofoga Fetalai, na pau lava lea o le mea na ou pasi ai, o le igilisi. A e silasila lelei i ai, o le isi uiga lena o le upu sin, o le tetee atu i mea ia la ia ua sii ai le tax i mea ia o pia ma tapaa, ae se i uma lelei ona toe fai lea o se tatou aoga faamolemole.

**FOFOGA FETALAI:** Faafetai o lea ua manino le tulaga lea. Se i tulai mai lau Afioga i le Minisita o Tupe.

**Afioga Hon Mulipola Anarosa Ale Molioo (Minisita o Tupe):** Lau Afioga i le Fofoga Fetalai, e fia faamanino pea le vaega lea ona o lea ua matau atu o lea e pei ua fesiligia foi le upu lea sin tax. E le o se faaupuga a tatou mo le silafia e le tatou Palemene, o le term lea o lo o faaaogaina e le WHO i lafoga lava ia e agai i le tapaa, aemaise foi o le tulaga i taumafataga o lo o agai ai i luga e tetee atu ai i le tino puta. Ia, o le faamalamalama lena i lau Afioga.

**FOFOGA FETALAI:** Faafetai. O lea ua manino lea tulaga.

**Tofa Hon Laufo Fonotoe Nuafesili Pierre Laufo:** Lau Afioga i le Fofoga Fetalai, leai e pau lava si... leaga ou te alofa tele i le Afioga i le sui usufono mamalu le Minisita o Tupe, leaga o lea e sainsi ai i le lauga. A o le a faapefea la ona tuuai le WHO a o ia lea e sainsi i le lauga?

**FOFOGA FETALAI:** Ia, o la e ua faamalamalama mai. O la e ua uma ona faamalamalama mai.

**Tofa Hon Laufo Fonotoe Nuafesili Pierre Laufo:** Ae afai o le lafoga i le beer, o le a le mea e le tau ai beer tax, a? Ae afai o le tapaa, o le a le mea e le tau ai tobacco tax? Vaai i le faigofie.

**FOFOGA FETALAI:** Le Sui Taitai, o le a tauau foi ina e faalogogata le Sui Taitai. E fai foi tatou mea ae te i ua tua leaga le tatou faamoemoe. Ia outou logosaia mai le Nofoa, leaga o lea ua tatou oo i le afiafi po, ia ua tau faaletonu mafaufau. O le mea lea, ia, e...

**Afioga Hon Valasi Luapitofanua Toogamaga Tafito Selesele:** Lau Afioga i le Fofoga Fetalai, ona o lea e vavao lava i luga o mea foi nei talu ai le feniniai o upu. Ou te manatua lava le tala a le isi toeaina na iinei i le Maota lenei, i le ote a le toeaina Foalalo na fai i lona atalii, "Sole, aua e te



ainini i lalaoa lou uto.” Ia o le tasi lena sin. O le fautuaga i le sui usufono lea na lauga, aua le ainini i lalaoa lana uto, se i tulou.

**FOFOGA FETALAI:** Ua ou manatu o le a faagata i i le mataupu lea ma e le toe... o le a umi ai le tatou taimi ma falo ai le taimi o le sui usufono mamalu o lo o tau faauma mai lana saunoaga. O le mea lea, ua ou faagataina felafolafoaiga i le mataupu lea ma faatonuina foi le Failautusi ina ia tuueseina le faaupuga lea i faamaumauga a le Fono o le agasala.

**Afioga Hon Tapunuu Niko Lee Hang:** Lau Afioga, o si mea lava lea atonu e malamalama ai le agasala. Ua fa tausaga o ou aoga i Aoga Tusi Paia, o le sin la e sau i totonu o le Tusi Paia o le agasala. Ou te le iloa la po o le a le eseese lea e taua e le Afioga i le Minisita, e ese le sin ese le agasala. O le sin lava o le agasala. Ma le faaaloalo lava.

**FOFOGA FETALAI:** Ia malie ia. O le sui usufono foi lea e saunoa o la e foi e aoga i le Tusi Paia. Ia, ae pei o la e ua tau toso mai lena vaega e tau fai ai ia mea a o la e ua saunoa manino le Minisita o Tupe e ana le lauga, ia o lena. Ma e pe tatou te o lava i fea, ae tatou te o lava i le mea o lo o i ai le lauga a le Minisita o Tupe. O le mea lea, ua faagata le talanoaga o lea mataupu ae faaiu mai le saunoaga toe tasi lou minute lau Afioga i le sui usufono, faauma mai lau saunoaga.

**Afioga LUPEMATASILA GALUMALEMANA TOLOGATA TOGIA TILE LEIA:** Faafetai i lau Afioga i le Fofoga Fetalai mo le avanoa. Ou te manatu o le a ou le toe tali atu i faamalamalama ia ua aumai, ae o le a ou see ese i le... sa tau fai atu se faamatalaga i le tulaga lea ua i ai le EPC i le taimi nei. O le a taatia ia le gau la e i ai i le taimi nei, e molimau le atunuu, a o le mea lea ou te tau talanoa atu ai, o le ave o le faamamafa i le atinaeina o malosiaga faafouina. O lea ua molimauina i le taimi lenei, ma o le mafuaaga foi lea e ala ai ona taugata le gaosiga o le eletise. Ae faanoanoa e vaai atu e le o i ai se fuafuaga a le tatou faigamalo ina ia atiae malosiaga faafouina ina ia aua ai ne i o tatou faalagolago i le suauu o lo o aumai mai atunuu i fafo. Aua o le faafitauli o le tatou faalagolago i suauu o lo o aumai i fafo, e le mafai ona tatou control ina. E pei o le isi lena fautuaga e tuu atu i tafatafa o le Afioga i le Minisita ma le tatou faigamalo.

**Tofa Hon Olo Fiti Afoa Vaai:** Lau Afioga i le Fofoga Fetalai o se mea e fia faasao lau Afioga.

**FOFOGA FETALAI:** Ia se i tulai mai lau Afioga i le Minisita.

**Tofa Hon Olo Fiti Afoa Vaai:** Lau Afioga i le Fofoga Fetalai e faamalulu atu i le sui usufono mamalu, o le sui usufono mamalu foi e lava lona silafia i lea vaega. E taunuu mai le faigamalo lenei o lo o taofia tulaga o le faiga o le faatinoga o le mea lea e saunoa i ai le sui usufono i le tulaga o le malosiaga faafouina. O lea la ua i ai pei lava o le vaiaso fou lea ua toe tatala atoa ai le tulaga lena, e le gata la i kamupani ae ua faapena foi i communities. O lea la ua i ai ma le mea faaopoopo lena, i le tulaga lava ia o communities pe fia fai ni a latou atinae ia o le malosi faafouina ma faatau mai i le EPC. O lea ua taoto nei le pepa lea i luma o le Kapeneta mo le pasiaina, ia ona faapena loa lea ona faatino le vaega lea. E i ai se tasi o kamupani po o lea e tau agai mai ai le sui usufono, o le kamupani lea a le isi vaega lea e tu ai le Green Market. E tele le atinae lea, ma e fua atu pe \$120 miliona Amerika lona faatinoina, ae pau lava o lea, o lo o faalagolago mai i le guarantee a le Malo. Ma e afai foi o faafogafoga mai le kamupani lea, ua taofia nei e le Malo le vaega lena, ona e mulimulitai le Malo i fautuaga a le Ofisa o le Tupe i le mea lava lea o le guarantee o ituaiga atinae faapea. Ia manatua foi lau Afioga, afai nei ae uma ona faatino le atinae tele lena agi mai le afa taeao faaletonu, lona uiga e fafa i luga o le tatou Malo le vaega lena.

Ae lau Afioga i le sui usufono mamalu, po o ai lava ni kamupani o fia agai mai i lea atinae, ia e tatala le avanoa pe a ou pasia le tatou pepa lea i le vaiaso fou. Ma le faaloalo.

**FOFOGA FETALAI:** Ia, ou te iloa o lea ua manino lau Afioga i le sui usufono mamalu i le tulaga tonu lea ua saunoa tonu i ai le Afioga i le Minisita i le popolega o lau Afioga i le sui usufono mamalu. Ia faauma maia le saunoaga leaga ua uma le ta taimi.

**Afioga LUPEMATASILA GALUMALEMANA TOLOGATA TOGIA TILE LEIA:** Faafetai i lau Afioga i le Fofoga Fetalai. Se sa leai lava se manatu ou te afea le vaega lela ne i te i ua tulai mai le Afioga i le Minisita, ae o lea lava ua tulai mai ae ou te le i taua se Green Market ma tulaga faapena. E ui o lea, o le a ou see ese.

Ona ou oo mai lea i le vaega mulimuli e faauma atu ai se faamatalaga, o le totogi o tagata faigaluega. O le talosaga a lenei itumalo i le Palemia ma le Kapeneta ma le tatou faigamalo o tulai mai nei, ia tautuana ma outou totogi o tagata faigaluega. E i ai fesoasoani na maua mai fafo e faatatau i le Koviti-19. Ae tataua ona ave le faamuamua i le tatou muaau o le afaigaluega o lo o nafa ma le puipuiga o le Koviti-19. E lagona lava le ootia ma le vaai alofa i tagata nei, e le gata i le lamatia o le latou soifua i aso uma, le lava se malologa, le mafuta ma fanau ma taitoalua ma aiga. O le mea lea ou te lagolagoina, se i toe silasila lelei le Malo, o lena e maua mai fesoasoani mai fafo ae faatino ai nai tauai ma totogi o nai tagata faigaluega.

O le isi mea lau Afioga, o lea e maua e oo mai lava i le taimi lenei e le i maua ni totogī o tatou sui usufono tamaitai lea ua uma ona faatauto e matua lagona ai lava le faanoanoa. O le faanoanoa lea i le sui usufono o lenei itumalo o Falelatai ma Samatau, e masani lava oan ou faalogo i saunoaga a le Maota lenei faapea foi lau Afioga i le Fofoga Fetalai, o le Palemene, o le supreme power lena, o le Palemene e fauina Tulafono. A o le matau a lenei itumalo, o le fai lava o sia mea tatou o i le faamasinoga, fai sia mea tatou o i le faamasinoga. A o le manatu o lenei itumalo, o i inei i le Maota lenei e malamalama i le Tulafono, aua o le Maota lenei sa faia le Tulafono. O le mea lea e avatu ai se tuualalo i lau Afioga i le Fofoga Fetalai...

**FOFOGA FETALAI:** Ua maea le taimi o le sui usufono.

**Afioga LUPEMATASILA GALUMALEMANA TOLOGATA TOGIA TILE LEIA:** E ui lava ina le amanaia le saina a Le Ao o le Malo, le amanaia le faaiuga a le Fofoga Fetalai ma le Maota lenei, ia o lea e oo mai lava i le taimi lenei e le i totogīa. O le popolega lena.

**FOFOGA FETALAI:** Ia, o lea ua maua le agaga o le sui usufono mamalu, taatia o lea foi e faafogafoga atu le Kapeneta, e i ai lava tulaga o lo o uia e le Kapeneta mo lea tulaga.

**Afioga LUPEMATASILA GALUMALEMANA TOLOGATA TOGIA TILE LEIA:** Ia, lau Afioga i le Fofoga Fetalai, faafetai. E tele nai mea e fia oo i ai, ae leaga ua utiuti le taimi, e tumu foi au i le ava ma le faaaloalo i lau Afioga i le Fofoga Fetalai. O se tuualalo mulimuli lava ae ou te le i nofo i lalo e faauma atu ai, lau Afioga i le Sui Palemia ma le Kapeneta ma le faigamalo, ua tatou i ai i taimi faigata, fua le ta i le tea, fuafua lelei tatou mea e fai i le taimi lenei ma le tamaoaiga o lo o i ai, e le o se taimi e fai ai se fia iloa o se isi ma fai ai se... fia lauiloa. O le mea lea...

**FOFOGA FETALAI:** Ia, ua ou vaelupeina le saunoaga a le sui usufono mamalu, ua uma ona saunoa le Minisita, e lua Minisita na saunoa, e le o faataga vaavaai foi le Kapeneta i ia tulaga. E manatu foi i saunoaga, e leai e faapena le agaga o le Nofoa, ia tuumalu a tatou saunoaga, pei ua uma ona saunoa le tatou Malo, o lea ua silasila i ai. O le mea lea, ua maea le taimi o le sui usufono.

**Afioga LUPEMATASILA GALUMALEMANA TOLOGATA TOGIA TILE LEIA:** Faafetai tele i lau Afioga i le Fofoga Fetalai mo le avanoa sa tuuina mai. Ia, e avatu foi malu i puega i le faafogafoga mai a lena Itu o le Maota aemaise o le saofaiga a le Kapeneta, ia e pei ona avatu sa matou tala, e le tuua ai i tua fautuaga, o fautuaga e manatu e fesoasoani i le

tatou Malo, a faaaoga lelei, a le faaaogaina foi, ia toe faafoi mai ia i matou a matou fautuaga. O le mea lea, ia manuia tele lau Afioga i le Fofoga Fetalai faapea foi lenei Palemene. Soifua ma ia manuia.

**FOFOGA FETALAI:** Malo faafetai. Ou te talitonu lava o lea ua malamalama foi lou finagalo ma o lea foi o lo o faamaumau uma mea ua e fautua mai ai ma e saunoa mai ai, o se taimi foi ona tali foi lea o le tatou Malo e uiga i mea uma na e saunoa i ai. Malo lava saunoa.

Ia, o le taimi lenei o se tasi o tatou sui usufono. Ia o lea ua fou mai le sa o Faasaleleaga 5, lau Afioga Peseta, o lou avanoa lea.

**Afioga PESETA VAIFOU TEVAGAENA:** Ia, e maualuga lenei afiafi i le alofa ma le agalelei o le tatou Matai. E faatalofa atu i lau Afioga i le Fofoga Fetalai, e ui lava ina tatou le usufono faatasi ma le Afioga i le Tamaitai Palemia, ia o le tatalo a lou nei sui usufono e ala atu i le Nofoa o lenei itumalo, tatou faamoemoe e tuu i luma o le Atua le auai atu o le Afioga i le Tamaitai Palemia i fonotaga e fai foi ma sui o si o tatou atunuu. Atonu foi e i ai se taimi e taunuu mai ma le manuia i o tatou eleele e faauma ai foi a tatou fonotaga i le lumanai. E momoli atu foi le faamalo ma le faafetai a lou nei sui usufono i la outou Aiga Kapeneta, i le afio o lau Afioga i le Sui Palemia ma le Kapeneta, e faapea foi a outou Afioga i Minisita Lagolago.

Ou te faatalofa atu foi i le Taitai o lenei Itu e ui lava ina tatou le aufono faatasi, ae manatu o la e taputapu mai i a tatou fonotaga, lau Afioga i le Sui Taitai faapea foi le maualuga o lenei Maota i le aotelega o le tatou Palemene.

E faatalofa atu foi i le paia maualuga i Ofisa Sili o Pulega o Matagaluega taitasi o si o tatou Malo, afio foi lau Afioga i le Tamaitai Loia Sili ma lou soatau. E faafeiloai atu foi lenei itumalo i le paia maualuga o le Matagaluega o le Fono aemaise lo oulua vaa seelua.

Lau Afioga i le Fofoga Fetalai, e fua foi le lauga a lenei itumalo i le taimi, aemaise foi o le tulaga o lo o i ai le tamaoiga o si o tatou atunuu. E muamua ona momoli lau faafetai i lau Afioga i le Tamaitai Minisita, e momoli foil au faafetai i le aufaigaluega faapea foi Matagaluega uma sa lagolagoina ma tapenaina le Tala o le Tupe. E talitonu lava lou nei sui usufono e le o se galuega faigofie, aemaise o lenei vaitaimi ua feagai si o tatou atunuu ma tulaga pagatia, e le gata i faamai, ae o lea foi tatou te faalogologo i taua ma fevaevaeiga o lo o tulai mai la atunuu. O lona uiga, e le o se tulaga tatou te taufesiligia ai mea e tutupu i lea taimi ma lea taimi, a o le agaga lena e momoli atu ai le agaga fiafia o lou nei sui usufono ma le agaga faafetai o lea ua faataatia i luga o le Laulau-a-Fono le Tala o le Tupe.

O le fesili lava lea lau Afioga i le Fofoga Fetalai i la outou Aiga Kapeneta, o le a se auala tatou te faia i le tulaga lea ua i ai le tamaoiga? Ia e pei lava ona ou fai atu i le taimi ua sola, o lea ua tatou vaavaai i le tulaga pagatia ua

tulai mai i le lalolagi, e pei foi ona saunoa se tasi o sui usufono, o lea ua faasalalau mai le \$1 lea Amerika, o le a sii nei le \$1 lea i se taimi vave. O lea foi ua faasalalau mai e le kamupani vaalele tele lea o le Air New Zealand lana foi siitaga i le 20% o lea o le a sii uma ai totogi o tagata femalagaai o le lalolagi. A tilotilo foi i le tau o oloa lau Afioga i le tulaga lea ua i ai le pau maualalo o le Tala o le Tupe lenei, aua o le mea moni lava, talu ona ou sau i le Palemene lenei, faatoa oo lava lea o se Tala o le Tupe i sona pau maualalo. Ia e pei ona ou fai atu, tatou te le faitio i lea tulaga ona o le tulaga o mea ua tutupu i le lalolagi, ioe. E fai o le afaina o si o tatou atunuu i le faamai, ae faapena foi i mea o lo o tutupu foi i la atunuu. Ae pei o le fesili lava lea e tulai mai i lou nei sui usufono, o le a se auala e ao ona tatou faia ina ia tau faapau laitiiti ai i lalo le tau o le soifuaga. Ona ou toe mafaufau lava lea lau Afioga i le Fofoga Fetalai i le tele o nai tatou atinae ia sa tapena foi e lenei faigamalo sa fuafua e faatino i le taimi lenei, peitai o lea ua taofia.

Ae a silasila lau Afioga i le Fofoga Fetalai i le afaina o le tele o pisinisi, ua tele ina tutu pisinisi. E laitiiti lava nai kamupani o lea e faamanuia i lenei taimi, a o le tele lava o nai kamupani, aua e faamoemoe uma lava pisinisi i le Malo, e faamoemoe foi le Malo i le aufaipisinisi. A leai la ni galuega e saili i ai le Malo aua le mamalu o le atunuu ma le aufaipisinisi, lona uiga e le mafai foi ona migoi le aufaipisinisi. Ae pei o i lea e faamoemoe i ai le Malo o le aufaipisinisi, ona o le tele o lafoga nei e maua mai totogi o tagata faigaluega. O le mea lea e avatu ai lava le tuualalo i la outou Kapeneta, se i toe silasila, toe silasila ifo i le tele o atinae, ona e ese le taua o nei atinae na tuu e amata i le vaitaimi lenei, o le a maua ai le tele o galuega a nai o tatou tagata. O le mea moni lava, po o le a le taugata o le soifuaga ma le tulaga lea e i ai, ae a maua lava galuega, e faigofie lava mea uma.

Na saunoa foi se tasi o sui usufono i le tulaga lea o le totogi o nai tagata. Ia na o se tuualalo lava e lagolago atu ai i la outou Kapeneta, pe le tataua ona toe silasila i totogi o tagata faigaluega a lo tatou Malo. O le mea moni lava i le totogi maualalo lea ua i ai, ua le gafatia le tau o taumafa, ona o tulaga lava ua i ai le tau o oloa mai fafo. Ae se i toe silasila ane pe le o le taimi lenei e tataua ona sii ai totogi o tagata faigaluega, ua le gafatia e tagata faigaluega le tau o le soifuaga. E le gata i taumafa a o oloa foi ia tau meaufale ma tulaga o mea faapena. E pei o le tulaga lena e avatu ai lau talosaga ia outou afioga i le Kapeneta, se i toe silasila ane lava i lena tulaga, ua tataua ona faatino nisi o atinae ua tataua ona amata, se i maua ai le tele o galuega a nai tagata. Aua o le mea moni lava, o le tele foi o nai pisinisi ua na o le laisene, laisene, laisene o taavale ae tutu. O lona uiga la a uma le tausaga e na o le tutu lava, o le fesili la lea, o lona uiga, e na o le tupe alu, tupe alu, tupe alu, ae le o maua ni mea e tua i ai nai o tatou tagata. Ia silasila foi lau Afioga i le Fofoga Fetalai, e tutusa lava le faatinoina o mea ia e lua, o le faatinoina o pisinisi ma le run ina o le Malo. E lelei la le Malo e tele aa e tu ai, a o pisinisi a nai tagata e tasi lava le aa e tu ai, a o lenei foi aa e tu lava ae faamoemoe i

faletupe. Ae pei o le aa lea ua tapuni foi pisinisi a nai o tatou tagata, a o le Malo e pe le isi aa, a o le a e ola isi aa. Aua foi e tele resources, e tele mea e tua i ai le Malo. A o le agaga lava ia o le Malo e le gata. O le Malo lava ia e vaavaai i lona atunuu, e le na o le vaavaai i le polofiti, ae vaavaai foi i le soifua laulelei ia ola lelei tagata uma.

E pei la o le tulaga lea e tele ina avatu ai le matou tuualalo i le tulaga o le tatou vaalele. O lea e pei ona ou taua le tulaga lea ua faasalalau mai e le Air New Zealand, o lea o le a sii i le 20% ia le totogi o tagata femalagaai. Ona o lea e soiso le Taitaifono, a o lea ou te fai atu, o oulua ma le Minisita lea o Galuega, taumafai e aumai le tatou vaalele. O le mea moni lava e tele le taugofie pe aumai le tatou vaa. A oulua le malilie i le vaa lea na tuu e aumai, ia aumai se isi vaa e te iloa e...ae pau lava lea o lau tatalo, aumai se tatou vaalele, aumai se tatou vaalele e fua i ai le.....

**FOFOGA FETALAI:** Ia malie le sui mamalu se i tuu atu le avanoa i le Minisita ona o lea ua e taua le suafa.

**Susuga Hon Laauli Leuatea Polataivao Fosi:** Lau Afioga i le Fofoga Fetalai, o lea lava e matau le saunoaga a le sui usufono, e leai foi se agaga e fia faalavelave. Ae pei o lea ua sa'i mai le sui. O ai o le a tuuai i ai le 20% lea o le a sii ai totogi o femalagaiga. Se malie lau Afioga i le sui usufono, e le utua i ni vai ia vaalele. E utu i le penisini la e aumai mai Ukraine, e leai ni tatou penisini. O ai o e faafuafua ia mea ia, its out of our control, totally out of our control. E le mafai la ona e sai mai le Malo e, o le a sii totogi o pasese i le 20%, we cannot do anything about it. E le mafai ona tatou faia, o le upu foi lea e te saunoa mai ai i le vaalele, ia se taimi saunoa lea o le Minisita o Vaalele i le mafuaaga na fai ai le tonu e taofi le vaalele, o se taimi ona outou faafofoga lea i ai. A o lea e pei e saunoa le sui usufono e pei e sa'i mai, e leai ma se mea a le Malo o faia.

Lau Afioga i le Fofoga Fetalai, e faatoa uma nei ona pasi le luasefulu pasene e pau ai le tau o le vai ma le eletise. E faatoa uma ona tufatufa atu le lima miliona mo turisi, tagata na aafia pisinisi. O lea e i le ogatotonu i le taimi lenei, sefulu miliona. O lea e faasoa, so o se tagata, o aafia ni pisinisi laiti i totonu o le tatou atunuu. O le miliona lea e taunuu i lima o le atunuu, toe tolu vaiaso. O le a le mea lene Peseta? O le fesoasoani lene i le atunuu. Ae leaga o lea e matau, e i ai e e faalele, ae i ai e e matau, e le o faia se galuega a le Malo. Se malilie ia sui ia fai o tatou fofoga ma vaai, fai foi o tatou fofoga ma faalogo. Ae pei o le tulaga lene, leaga o la e matau mai le atunuu, faapea o.o. e sao la, e na o le laisene laisene o taavale, a o lea e le feoi, o la e feoi taxi, o la foi e feoi pasi. Ae pei e faapena se fesoasoani atu, o lea e taumafai atu la tatou Faigamalo fou, tuu mai se avanoa, e faatoa tasi ma le afa tausaga, se i faasolosolo atu. Na matou omai i totonu e \$1.2 piliona le aitalafu, o lea e tau tuutuu mai i lalo, e taofiofi galuega tetele e le

tatau ona faia, faamuamua tagata o lea e faasolo atu. Ua pau pasese o tatou vaa i Savaii. O la o le a fai lou ofisa, o oe e Taitaifono, ia se i silasila la i ai. O fea la le isi mea e toe tagisa i ai, o lena ua avatu mea e ...its all in your hand, pe cash pe aitalafu o le tupe e atiae ai lou itumalo. O si au toe faamanatu atu lena.

**FOFOGA FETALAI:** Mo le faasaoina o lou taimi lau Afioga i le sui mamalu, se i tulai mai lau Afioga i le Minisita o Galuega.

**Tofa Hon Olo Fiti Afoa Vaai:** E pau lava si vaega lea ou te fia faamanatu atu i le sui usufono, ia e faamanatu atu i lau afioga, o lea ua leva ona soli e le sui usufono Tulafono Tumau o le Maota, o le tusi mai fua o lona aao ia i matou. E manatua foi e sa le tusi o le lima o le isi i le isi, a o lea lava e fai ma tusi mai, ia toe tuu i lalo lou lima. O lea lava e fai ma...na ona faamanatu atu.

**FOFOGA FETALAI:** Ia le sui usufono mamalu... o fea e agai i ai lau... e te agai i o ia Peseta.

**Afioga Lupematasila Galumalemana Tologata Togia Tile Leia:** Ia ou te fia fesoasoani e faamalamalama le mataupu lea na saunoa i ai Peseta.

**FOFOGA FETALAI:** Ailoga e fetau pe a e faamalamalama fua le mea o la e finagalo Peseta i ai. Ou te iloa e leai se mea o le a e faamalamalama ai fua. E lafo pea ia Peseta ia lona finagalo ua leva ona uma lou taimi. O le mea lea, e leai e avatu pea le fesoasoani i le sui usufono mamalu, leaga o lea e faafogafoga le atunuu, faapea o lea e sao le saunoaga a le Minisita, faapea po o a tatou mea ia e fai. Aua le popole, e masalo o lea ua saunoa foi le Minisita o Faatoaga i le uluai seleselega, e tasi lena fesoasoani mo i tatou e le o toe mamao. O le mea lea, aua le faapopoleina lau Afioga i le sui mamalu, o lea lava e agai i luma le sa o le tatou Malo, o lea faatoa tasi le tausaga. Ia saunoa mai lau Afioga faaauau mai le saunoaga.

**Afioga PESETA VAIFOU TEVAGAENA:** Lau Afioga i le Fofoga Fetalai, e saunoa loa le Minisita lea, fai atu lava lau Afioga, e mo le galu e faafua ae le fati. Ae ese lou fia faalogo i ai, e fia faalogo i ai, ae maumau lava o le Afioga i le Minisita, e i ai lana poloketi lea sa.... e faasalalau mai le poloketi a le Minisita. O le a taatia le vaalele ma mea ia, se i ou oo i le.... i te i foi ua tipi mai lou taimi lau Afioga i le Fofoga Fetalai. E i ai le toeaina o le matou nuu na sau, talanoa mai ia te au i le afiafi lea, ma lou le iloa o lea e saunoa foi le Afioga i le Minisita i le.... o se atinae taua tele. O le faasea la a le toeaina, ua taugata le soifuaga po o le a se mea e tatau ona fai. Ou fai atu, tama e leai se mea e mafai, ioe, e pule mai lava atunuu i fafo i mea ia ua

tulai mai, e faapena foi le faamai. Ae ua ou faateia i lou vaai atu i lau TV, o sau le polokalame a le Afioga i le Minisita. Ona ou matamata lava lea po o le a le uiga o le mea lea e talanoa i ai le Minisita, ae ou vaai atu o le bee a le Minisita lea ua sau. Na fai mai le toeaina lea, faatali, Peseta malie lava lou loto, o le a le bee lea e talanoa i ai le Minisita. Ona ou faalogologo lava lea po o le a le uiga o le atinae. O lea la e faafesili atu ai i lau afioga, o lea ou te fia malamalama i lau poloketi lea. Aua o lea e maua i lau faalogologo aua ua agai i mailei puaa. O le a lau bee lea na ou faalogologo atu, atonu o le a maua ai se isi faamama avega. Aua o lea ua tatou vaavaai i le taugata e pei o le suka, masima, a o le atinae lea e manaia lea na aumai e le Afioga i le Minisita, aua o le bee foi lea e maua ai le honey. Aua o le taua la ia te au o le polokalame, ona e afai o lea o le a toe sii le tau o tiute o meataumafa, o lona uiga e tasi lea atinae e taua tele. Ae faalavelave o le Minisita, o lea ua faagalo lana bee, ae ua na o le talomua, talomua, talomua. Lau Afioga i le Minisita, se e taua lava le mea lea na e saunoa i ai, ina ia saunoa ma faatino, saunoa ma faatino.

**FOFOGA FETALAI:** Ona o lea ua e saunoa sao i le Afioga i le Minisita.

**Susuga Hon Laauli Leuatea Polataivao Fosi:** E tele poloketi sa ou talanoaina i mea tau faatoaga lava ia. E maumau pe ana e afio atu i le talomua a le tatou nuu i Samalaeulu, manu ua maua ai sau uilipaelo, maua ai sau sapelu ma sau faila, o sau suotipi o sau oso, o mea uma na o lea na avatu i tatou fai faatoaga i o. A o le mea lea e te saunoa i ai e na o le faafua ae le fati. Peseta ua soo uma tuamaota o Gagaemauga 1, i pusa la e faafailele ai bee, e le o se mea la e na ona tau ae le o tupu. O lea ua matua toe uunai le polokalame o mea tau bee lea e te saunoa mai i ai. Na tiai e le Nofoaiga lea na uma atu nei, e leai ma se isi na toe popole i ai. A o lea ua toe faasolo atu galuega a le Matagaluega e faatino le tulaga lena. E sao oe, e taua tele, le tulaga leaga o le bee, le lagomeli lea, e feaveaia le pollination o flowers e fua lauusi ai fua o faaeleleaga, ae toe maua ai ma le suamalie lea la e te fai mai ai. E te fiafia tele e te talanoa i le honey leaga e tele au honey. O le faamalamalama lena lau Afioga i le Fofoga Fetalai. E le o se mea la na ona faafua, e leai o lea e tupu. Ma lou agaga faaloalo.

**FOFOGA FETALAI:** Ia malo faafetai. O lea la ua manino atu le poloketi lea e taua e le sui o le bee, ia o lea o le honey bee le poloketi lea ua saunoa manino le Afioga i le Minisita. Aua e te popole o lo o faatino lava. Ia faaauau mai le saunoaga.

**Afioga PESETA VAIFOU TEVAGAENA:** Lau Afioga, e ala ona fiafia le Minisita i le mea lea o le honey, leaga o ia le isi lea e tele honey lea e i ai nei. Ona ou oo mai lea i le tulaga lea, leaga o lea ua saunoa mai le Minisita



i le tupe lea miliona. Sa ou le manatu ou te fia agai i ai, aua o lea ua aumai i le Tala o le Tupe, leaga o lea ua taua le tulaga lea. Ona manatu lea, o le a agai sao atu ia i le Minisita o Tina ma Tamaitai, leaga o le miliona tonu lea a lau Afioga. Ou te faamalulu atu foi i lau Afioga, manu o lea ua maua le avanoa, ua aoga foi le saunoa mai o le Minisita.

E leaga o au le isi itumalo, o lenei e tu i le va o le vanu o le ata ma le oti, po o le a le mea o le a oo i lenei itumalo. A o lenei taimi, e fai o le le mafai ona lesitala, po o le mea ea ua fai lenei Itu ae taatia lenei Itu. O le uiga o lau faamatalaga o lea e faalogologo lou itumalo, o lea ua onosaia e lou sui usufono, le mea na tofa i ai lau Afioga, e tatau ona ou alu i si ou nuu, e faamalamalama le tulaga lea, ae peitai ua le ogatasi foi le futia ma le umele. Ua ese foi le tulaga ua i ai le tofa foi a se tasi foi o si ou nuu i si ou itumalo. Ae ui i lea, o le agaga faafetai ia te au lau Afioga i le Minisita o lea ua e tali mai. O lea ua ou maua lau tusi, o le a ta malaga i Savaii. O le mea lea le tatou itumalo, afai o lea ua outou faafogafoga mai, ia leaga ou te iloa tou te le talitonu i au tala na avatu. Aua ne i galo ia te outou, o saunoaga lava a le Minisita lea na ou oo atu ai, lea na faaoo atu. Aua e lelei o lea ua tafa le finagalo o le Minisita i le tatou nuu, o lea o le a ma oo atu i le Aso Toonai. Ia o ane uma lea e fai mai fesili, o fesili uma lava ia na ou tali atu ai, o lea foi o le a toe saunoa le afioga i le Minisita. O le agaga fiafia lea ia te au lau Afioga, ona o lea ua saunoa foi le Minisita o Faatoaga i le tulaga lea. Ae faafetai o lea ua ou toe manatua, o le measili faafetai o lea ua faaleo atu, ne i faapea nisi o afioga o lou itumalo, ai e leai se mea a le sui usufono o faia. E leai e lea e le o iloa mai e lou itumalo, e fai mo au le Ofisa o le Minisita i vaiaso uma. O le agaga fiafia, o lea ua tafa le finagalo o le Minisita o le a ma malaga i Savaii.

Lau Afioga i le Minisita o Galuega, e i ai nai atinae po o galuega foi a si ou itumalo. E masalo o lenei e taoto i le Matagaluega talosaga a lenei itumalo ua leva. O nei talosaga o talosaga na fai mai lava i lou Paeaiga muamua, o taligalu. Ona o le tele o le afaina sa oo i ai si ou nuu, na iu lava ina afaina ai le malumalu foi lea o le Ekalesia o le Au Paia o Aso e Gata ai. O lea ua sii ai le malumalu agai i le vaotele ona ua afaina uma le mea sa tulai ai i luga o le sami. O la e ia te au le kopi o le talosaga, o la foi e i ai ata na tuuina atu i la foi vaiata. E pei sa ave foi le faamuamua foi a lenei foi Itu i le tele foi i talosaga na muamua, e faapena lava le tulaga o lo o i ai le tatou Faigamalo. E faasoasoa lava ma le tatau ia galuega i lea itumalo ma lea itumalo. Ae na ona faamanatu atu, silasila ifo i ai lau Afioga i si ou nuu o Puapua. E i ai foi nai nisi o auala e fia faalelei i si ou itumalo i Puapua ma Lago ma Asaga, e pei lava ona ou fai atu, o auala nei, o auala ua uma ona faatino...

**FOFOGA FETALAI:** Ua ou vaelupeina le saunoaga a le sui usufono mamalu. E talu ai o lea ua tatou oo i le tatou malologa, se i toe taliu mai ona

faaauau lea o le saunoaga. E toe sefulutasi ma le afa minute le sui usufono mamalu, pe a tatou toe taliu mai i le tatou malologa.

*Na faataatiaese Taualumaga a le Fono Aoaio Faitulafono mo lana malologa i le itula e 7:45 i le po ma toe faaauau i le itula e 8:28 i le po.*

**FOFOGA FETALAI:** Ou te faasilasila atu ua toe amatalia nei Taualumaga a le Fono Aoaio Faitulafono.

E fia faaleo lava le faafetai i le onosai o le tatou Maota e tusa o le tatou galuega. E i ai le manatu ua saioalo le taligasua a outou Afioga, ia, e le o toe umi foi se taimi o totoe o le tatou galuega i lenei afiafi.

E faataatiaese tatou Taualumaga mo le malologa o lo o saunoa le sui usufono mo Faasaleleaga 5. Ou te tapa ma le faaloalo le sui usufono mamalu mo le faaauaina o lau saunoaga.

**Afioga PESETA VAIFOU TEVAGAENA:** Faafetai i lau Afioga i le Fofoga Fetalai, o lea foi ua matu i fau le taliga o le sua a le mamalu o le Palemene. E momoli foi le faafetai a lenei sui usufono i le Mataglauega o le Fono ona o lenei foi faamalositino ua maamaau i ai aua foi le taligasua a le Palemene.

Ia, lau Afioga i le Taitaifono, leaga o lea e le o afio mai le Minisita e fia faauma atu ai si au mataupu, o si vaega lea e ao lava ona faamanino leaga o lea na saunoa lau Afioga i le Minisita o Faatoaga ma Faiga Faiva, o lea na e saunoa e omai le tou faigamalo e \$1.2 piliona le aitalafu o lo o i ai. E leai na o le mea e fia faasao lau Afioga i le Fofoga Fetalai, o lea e sese le tuuaiga lea, e le i au lava se aitalafu a le faigamalo lea i se \$1.2 piliona. O le mea lea e te talanoa i ai o le tamaoaiga sa i ai i le taimi lena e \$2 piliona le tamaoaiga o le atunuu. A o le aitalafu sa i ai e i lalo ifo lava ma le \$1 piliona, ona o faiga faavae lava ia a le Malo i mea nei o aitalafu, e le mafai lava ona sili atu se aitalafu nai le 50%. O faiga faavae na o mea nei o aitalafu. O le ala lena lea na ou fia faasao le tulaga lea, leaga o la e faafogafoga le atunuu. E see mai le tou faigamalo, o aitalafu sa i ai e i lalo ifo o le \$1 piliona le aitalafu a le tatou Malo e le i oo lava se aitalafu i se \$1.2 piliona. A silasila foi lau Afioga i le Fofoga Fetalai, ua silia ma le 8 tausaga e le i toe faia lava ni aitalafu a le tatou Malo. Na gata mai lava loan i le taimi sa taumafai ai ona fausia le tatou malae vaalele fou, le fale lea e i ai nei le malae vaalele i Faleolo. Ia pei o le taimi lena lea na gata ai i ina aitalafu ia sa fai e le faigamalo lenei, a o lena ua ou tau atu e fia faasao, e leai e le i au lava se aitalafu talu ona outou seei mai i le Malo i se \$1.2 piliona. O le aitalafu sao sa i ai, e i lalo ifo o le piliona, leaga o faiga faavae lava lena. O le faiga faavae e ao ona 50% le faiga faavae sa i ai le tatou tamaoaiga.

Ia lau Afioga i le Sui Palemia, ia, e pei foi ona saunoa se tasi o sui usufono i le tulaga lea i mea ia o lafoga. E moni lava foi ua uma ona talanoaina e le Maota, ae i lau vaavaai ma lau matau, o lea ua pagatia le tatou atunuu, ua manaomia e le atunuu lenei se fesoasoani. E pei lava foi ona ou taua i nisi foi au lauga i nisi foi fonotaga ua mavae, nisi foi o atunuu e ao lava ona totogi uma lafoga a tagata, e fua la i ai i le tamaoaiga o le atunuu. O lea la ua feagai nei Samoa ma le faafitauli lea ua i ai nei, e fai o le taugata o le soifuaga, ia e pei lava ona ou fai atu, tatou te le tuuaia le... o mea lava ia e tutupu i le lalolagi pei ona fai mai le Tusi Paia e i ai mea o le a tutupu, ioe. O le a oo mai faamai, o mafuie, o afa, o lologa. O lona uiga, e le o se mea fou lenei mea, ae ao ia i tatou o Taitai o le Malo ona tatou tapenapena, ioe. E ao ona tatou tapenapena, ina ne i mea ua tatou naunau e faatino mea ia na tatou taumafai i ai a outou seei mai ona faatino lea pei o lafoga. Ia o lea e avatu lava lau tuualalo i lau Afioga i le Sui Palemia ma le tou Kapeneta, toe silasila lava i le mea ua oo i ai le mafatiaga o le atunuu. Ioe. Afai o lea na fai e pei foi ona saunoa lo tatou Alii i se faataitaiga i le lalolagi, ia, e ao lava ona tatou usitai, lea ua limataitaiina le tatou Palemene i lo tatou Atua, o mea uma lava e taitai uma lava i le mea e finagalo i ai lo tatou Atua. Afai o lea na totogi lafoga a lo tatou Alii, e tatau lava ona totogi lafoga a tagata uma. E tele foi nisi o faafeagaiga e talanoa mai ia te au, o latou ia e manaio lava e totogi a latou lafoga, aemaise o le vaai alofa i le tulaga pagatia lea ua feagai ma le atunuu. Ioe. Aua e le o ni lafoga tetele, ae ao ona tatou vaavaai i mea e ao ona manuia ai si o tatou atunuu, ona o lea ua tele mea tatou te manaomia, ae ua leai lava se mea e mafai i le taugata o le soifuaga ua i ai nei. A silasila foi i le tau o le suauu lea ua i ai, ia, ua matua matautia le mea lea ua i ai, e oo i le tau o le penisini.

O le vaiaso lea na tea nei na ou maua mai ai le isi taavale i Vailoa, ua poloka ai lava le auala, ua pe le taavale i le auala, ona ou oso lea i lalo faatafa ae tulei i tua. Ou faiatu lava lea i le avetaavale po o le a le mea ua tupu ae fai mai ua uma le penisini. Ona ou mafaufau lava lea i le tulaga lea, afai lava o le a faapea lava ona tumau pea ona feagai le lalolagi ma faamai, ia aua o lea ua tatou molimauina o lea foi ua sauni mai le isi virus lea toeitiiti oo mai i le tatou atunuu. O lona uiga, e faatupulaia pea faafitauli o le a faeagai ma si o tatou atunuu. E le mafai ona tuua, ona e solomua mai foi i atunuu tetele i fafo, e pei lava foi ona ou taua mea foi o lo o vevesi ai la faigamalo. Aua a vevesi la faigamalo, ua afaina uma atu ai lava ma si o tatou atunuu ma le Pasefika atoa. O le ala lea e tuu atu ai lava le tuualalo i lau Afioga i le Sui Palemia, toe silasila ifo lava i le Tulafono, i le Tulafono, ioe, ina ia tatou vaavaai. O i nei lava i le Maota lenei e fau ai a tatou Tulafono ina ia ola ma soifua tutusa tagata uma. Ioe, o le aoga lena o le Maota lenei. Ou te le fefe lava e tautala i le tulaga lea, leaga o lea ou te talitonu lava au ia, afai lava tatou te talitonu i lo tatou Atua, aua tatou te vaai i se isi itu, aua foi tatou te

vaai i le musumusuga a le tagata, ae tatou vaai i le isi tagata o lo o manaomia le fesoasoani.

**FOFOGA FETALAI:** Toe 5 minute o le sui usufono.

**Afioga PESETA VAIFOU TEVAGAENA:** O le mea lea lau Afioga, o lena ua avatu lau tuualalo.

**FOFOGA FETALAI:** Ia ma e avatu foi se fautuaga a le Nofoa i le saunoaga a le sui usufono mamalu, ia talu ai ona o lea ua paia tulaga o lafoga o lo o galulue le tatou Komiti i le iloiloaina o lafoga e pei ona saunoa i ai le sui usufono. E i ai le manatu, o le a le mafai ona tatou oo i ia tulaga ona o lo o galulue le Komiti, o lo o feiloai foi ma sui usufono o le atunuu.

Se i tulai mai le Taitaifono o le Komiti.

**Afioga Niuava Eti L. Malolo:** Lau Afioga i le Fofoga Fetalai, e pei e le i i ai lava se lagona e faalavelave foi i le saunoaga a le sui usufono mamalu, ae pei o nai vaega na o lea e fia faamalamalama lau Afioga i le sui usufono mamalu, o lea ua tea ma le afa le faatalatalanoaga foi a le Komiti i tulaga foi i le tax a tatou faifeau. Masalo o se taimi o se fonotaga o i luma ona faataatia mai lea o le Lipoti a le Komiti, e i ai le tulaga ua fuli i ai le finagalo foi o le atunuu i le tulaga i le tax a faifeau. O le mea lea malie lau Afioga, masalo o se taimi ona taunuu lea o le Lipoti ona malamalama lea o le finagalo e pei ona faataoto ma aumai ai foi le tuualalo. O le soso atu lea lau Afioga i le Fofoga Fetalai.

**FOFOGA FETALAI:** Ia, ua ou manatu o lea ua saunoa le Taitaifono o le Komiti, e i ai foi le manatu le sui usufono mamalu, atonu e i ai foi se taimi e aumai ai i luma o le Palemene, ia o le avanoa lena. Ae ua i ai le manatu o le Nofoa ina ia faataatiaese pea le tulaga lea mo le taimi lenei, atonu e i ai se taimi ona oo mai foi lea i luma o le Maota. Ma le faaaloalo i lau Afioga i le sui usufono mamalu, faaauau mai le saunoaga toe lua ou minute.

**Afioga PESETA VAIFOU TEVAGAENA:** E momoli atu le faafetai. Faafetai foi i lau Afioga i le Taitaifono, o lea ua manino foi le tulaga lea, ae pe le o lea o lo o tatou i luga o le lauga faalauaitetele o le Tala o le Tupe.

Ia, ona ou oo mai ai lea i lau Afioga i le Minisita o Faamasinoga, ona e pei o lea sa tele lava foi nai a matou fautuaga na tuuina atu foi i le taimi ua sola i le tulaga o tatou faamasinoga o lo o i ai nei i le taimi lenei, ona o le tele o faamasinoga tuua ona o nisi foi o mataupu pei o lea ua maea atu.

Ae o lau talosaga i lau Afioga i le Minisita, se i toe silasila ane lava ona o le tele o faamasinoga aemaise lava faamasinoga apili. Ia pei o mea ia o faamasinoga o faamasinoga o mataupu masani lava, ioe. E le o ni tulaga o

aafia ai tulaga ia na talanoaina e le Palemene. Ae pei o le tulaga lea ua tulai mai nei, ua taofia uma atu ai lava ma faamasinoga ua tatau ona faaauau. Aua o le mea moni lava, o le tele o faamasinoga nei ua maea, ae pei ua avea le mataupu na tulai mai i pili nei e tolu lea e aafia ai le Afioga i le Peresetene, ia o lea ua maea, ua soalaupule foi o lea ua manino vaega uma. E tuu atu ai le tuualalo i lau Afioga i le Minisita, ia, ona o lea e toatele lava nai a tatou faamasino o lea e avanoa i lenei taimi, ae ua tele nai mataupu tuua, tele faamasinoga a le atunuu, aemaise lava le tulaga lea ua uma ona totogi tupe e tuu mai ai i luma faamasinoga, ua tau mai aso e faatino ai faamasinoga, a o lea e oo mai lava i le taimi lenei o lenei lava e taofiofi tatou faamasinoga apili. O le mea lea e tatalo atu ai i lau Afioga i le Tamaitai Minisita, se i toe silasila ane lava i le tulaga lea, le tulaga lea. Aua o le tele o faamasinoga nei, o faamasinoga e le o aafia ai mea ia na talanoaina i le tatou Palemene. O le a se tofa i lau Afioga ae faaalu ia vaega ua tele meatotino a aiga o lea ua poloka uma ona o le tulaga o lo o tulai mai i le tatou Matagaluega.

Ia, lau Afioga i le Fofoga Fetalai, ia leaga o lea ua ou vaai atu ua uma lou taimi, e pei lava ona ou talanoa atu e le tagisa foi lenei itumalo. O le agaga ma le talosaga i a outou Afioga i le Kapeneta, ia se i toe silasila ane lava, toe silasila ane lava i le tamaoaiga o si o tatou atunuu. O le matou tatalo lena ua tuu atu. A silasila foi i nai pasi ma taavale laiti, ua matua le taitai ona talafeagai le tulaga aemaise pasese o taavale laiti ma pasi, o le taugata o le suauu, e pei ona avatu lau talosaga, ua tatau ona toe silasila le tatou Malo, ua tatau ona toe sii le totogi o tagata faigaluega, ina ia mafai ona gafatia e tagata le taugata o le soifuaga. E le faapea o se tulaga ua tulai mai ona o le tatou faigamalo po o le a, ae avatu sao lava le talosaga a lou sui usufono ona o mea ua tutupu i le lalolagi lea ua tatou faapenei ai. O lona uiga, e ao ia i tatou o Taitai o le tatou atunuu ona tatou silasila i se isi tulaga ina ia gafatia e tagata uma le tau o le soifuaga ua i ai.

Ia lau Afioga i le Fofoga Fetalai, ia talu ai ona o lea ua e saunoa ua uma lou taimi, e ia te au foi le agaga o le faaaloalo ma le migao i lenei itula o le afiafi e momoli atu ai lau faafetai tele i lau Afioga i le Fofoga Fetalai. Ia e momoli atu foi le faamalo ma le faafetai i lena Itu o le Maota i lo outou Aiga Kapeneta aemaise foi lenei Itu i lenei foi usugafono, atonu foi e i ai se taimi i mea taitasi, o le a taumafai ai e toe avatu nai nisi tuualalo, ae paga lea ua uma lou taimi.

Lau Afioga i le Fofoga Fetalai, ia manuia tele taimi o totoe o le fonotaga i lenei afiafi.

**FOFOGA FETALAI:** Malo faafetai. Faafetai lava i le saunoaga a le sui usufono mamalu mai Faasaleleaga 5, malo saunoa. E talitonu o lea foi ua aumai le tofa i nisi foi o fautuaga taua mo le tatou tamaoaiga, atonu o lea foi ua faafogafoga ma le totoa le tatou Malo i tulaga um e pei ona aumai ai le fautuaga. Ae malo lava saunoa, faafetai foi le faasoa, faafetai foi le lagolago

mai i le tatou Nofoa aua tualumaga o tatou galuega. O le mea lea malo faafetai.

Ia o le avanoa lenei o se tasi o sui usufono o le tatou Maota. Oi, o lea ua matau atu o lea ua fou mai le sa o le sui usufono mamalu mai Aana Alofi Nu.3. Lau Afioga i le Minisita Lagolago Agaseata.

**Afioga AGASEATA VALELIO TANUVASA PETO (Aana Alofi 3):**  
Ou te tulai i le ava ma le faaaloalo e avatu le agaga o le faafetai i lau Afioga i le Fofoga Fetalai, e tusa ai foi ma le avanoa ua faapena ona tuuina mai i lenei sui usufono ina ia faapena ona avatu se motugaafa aua le tatou Tala Faatatau Autu o le Tupe 2022/2023.

E faatalofa atu i lau Afioga i le Sui Palemia faapea foi le Vasega Kapeneta i alii ma tamaitai Minisita. E faatalofa atu foi i le paia maualuga i le nofo a Minisita Lagolago. Matou te faatalofa atu foi i lau Susuga i le Sui Taitai, aemaise le paia maualuga o lena Itu.

E ofo alofa ma faatalofa atu foi i le paia i lau Afioga i le Loia Sili ma le mamalu o le Ofisa aemaise foi le paia o Ofisa Sili o Pulega o Matagaluega a le Malo, aemaise foi o Faalapotopotoga Tumaoti.

E faatalofa atu foi i lau Afioga i le Failautusi ma lou Soa aemaise foi o le paia o le aufaigaluega o le Maota nei.

O le a ou le toe paopoina faatupemuli o taulafoga paia ma sa ma mamalu, aua o paia lava mai le vavau e oo lava i le faavavau ua uma ona aisa. Ae ua ou manatu o Samoa o le maea na tatau mai matafanua nai posamese seia paia le siufanua nai le lualoto o alii. Tulou ia, tulouna lava. Ae momoli atu le faafetai tele i lau Afioga i le Minisita o Tupe ma le Mataglauega ona o lo outou fitaituga ma lo outou vaili i mea lelei, o lea ua outou tapena ai ma fuafua ai lenei Tala o le Tupe e fua i le tatou tamaoaiga aua le lufilufi ma le faasoa limalelei i Matagaluega aemaise Faalapotopotoga a le tatou Malo.

Ia lou itumalo e Aana Alofi Nu.3, ia tapuai maia mo se manuia.

Lau Afioga i le Fofoga Fetalai, na ou sau lava i le ala o lo o taoto liaga o le sami, ona ou manatua lea o le fautuaga a Puipuialii ma Leuluailii i le tama o Li'atama ina ua ia faailo le usus malo ua maua, sau ina e ui i toa, aua ne i e ui i fuialoa ne i maumau ao le tauese. O le a tau maia na o le auga o aute ma fatu ai le titi ma sui ai le faasolo ne i maumau lou avanoa ua tuuina mai. Ou te manatu i le manatu autu o le Tala o le Tupe e i ai faaupuga, faatupulaia le tamaoaiga mo le manuia o Samoa.

Lau Afioga i le Fofoga Fetalai, o le agaga lea o le faafetai, aua o lea ua faamuamua tagata, aua o le manulauti lea e pei ona fafatu ai le tatou Tala o le Tupe e pei ona faasoa mai ai le tamaoaiga o le tele o Matagaluega. A o le fesili; e faapefea ea ona tatou faatupu le tamaoaiga? O lou nafa, ma lou nafa, o la'u ma lau, o le tatou faamaite lea ma faatino. E le na ma le laina le mafuaaga ua tatou matauina ma o tatou molimauina ua mafua ai ona oo mai o tatou laueleele ma o tatou laufanua mafatiaga e pei ona mafatia ai le lalolagi atoa, ona o vesiga ua mafua ai ona taugata le soifuaga e pei foi ona maua i saunoaga ma tuleiga o lenei aso. Ae manatu le taofi, afai o lea ua uma ona tapena faafafine toaga e i latou o lo o i ai le tomai ma le poto faapitoe e fua i le tatou tamaoaiga mea ia ua i o tatou lima. O lona uiga o le a fai i ai le faasoa, o le a fai i ai lau faatinoga tatau i le faamuamua e tatau ona ave i ai le

faamuamua. Ona i ai lea o le taofi, o lau e tau ina fesoasoani ai e faamaite le faatupuina o le tatou tamaoaiga, o le auga lea ma le tatou aoga lea.

Muamua, o le ausia o matatia fuafuaina e pei ona faataoto mai e le Tala o le Tupe. O le ausia o matatia ua mafai ona ausia vaega o le tamaoaiga o lo o faapena ona tatou tilotilo i ai ma vaavaai i ai e ono maua mai ai.

Lau Afioga i le Minisita o Galuega Tetele, o lau faasoa, afai o lea ua matua taugata le suauu, o le suauu o ia lea o lo o taitaiina le taugata o le soifuaga i le taimi lenei, aua e oo lava i lou tunoa, e oo lava i lou femalagaai, e oo lava i le faatinoga i totonu o lou ofisa, e i ai lava le aafiaga o le suauu, ma ua mafua ai ona mafatia le taugata o le soifuaga. Ona i ai lea o se fesoasoani ma le faasoa, lo tatou malosiaga faafouina, e tele faletetele, a o i ai se Tulafono e mafai ona faataoto ma faataatia ina ia faapena ona tapena ai faletetele, falegaosioloa, falefaigaluega e oo lava i faleaoga, falesa, o maota o faafeagaiga. O fale ia, po o maota ia, afai o i ai se Tulafono pe ono tapenaina se Tulafono ina ia fausia faapitoa ai fale nei, a ia faapena ona faataoto ai le tatou solar system, solar panel, ina ia faapena ona teuina ai ma aoina ai le malosi o le la, e fesoasoani i tulaga tau eletise o le malosi faafouina.

O le Matagaluega o le MCIL, o le Matagaluega o Faatoaga, o le Matagaluega o Tina ma Tamaitai, faafetai o lea ua tino mai le faamoemoe sa fauao faupo ina ia faapena ona lalafo atu le tamaoaiga i aao ma lima o itumalo, i lima o tagata ina ia faapena ona fatu ai ma atinae ai itumalo taitasi, fua mai ma tupu mai le tamaoaiga e toe foi mai i totonu o le Malo ina ia faapena ona faatino ai ana galuega.

O le fautuaga la; o lea o le a faatino fale e faapena ona nofoai ai le aufaigaluega ma faatino ai aoaoga a le Komiti o itumalo. O le mea lea e tatalo atu ai ma lou talitonuga, o le tele o nei atinae, o i lava i mea tau faatoaga, o mea tau faigafaiva, a o i e mapuna ae ai le malamalama ma le tomai pe afai e galulue faatasi Matagaluega nei ma itumalo i fonotaga i itumalo nei e auina atu i e o lo o i ai le silafia ma le tomai ina ia faapena ona aoaoina ai itumalo nei. O le lava o le silafia ma le tomai, o le faigofie foi lea ona faatino manaoga ma faatino atinae. Le Matagaluega foi lea mo aoaoga ina ia faapena ona i ai le silafia o le tagata i le paketiina o lana tupe ma le fausiaina o lana pisinisi, tasi lea vaega e tatalo atu ai ina ia faapena ona oo atu le aoaoga lea ina ia mau tufaaga ai i latou e faatino ai le faamoemoe pei ona aumai ai le faatuatuaga ma le faamoemoega o le tatou Malo.

Ua saunoa nisi sui usufono i mea e tau o TVET providers. A oo ina tino nei le faamoemoe ma amata le faamoemoe lea o le tai \$1 miliona, e i ai lou talitonuga e i ai isi galuega e faaopoopo atu, e manaomia le silafia i le faaaogaina o masini tetele o lea o le a aapa i ai itumalo ina ia faatino ai a latou faatoaga. E manaomia le silafia ma le atamai ma le agavaa aua le faatinoina o faigafaiva i le gataifale, e le gata i lea o vaafagota. O le tatalo, faaluaina ma e lagolagoina le taofi, a lava a tatou TVET providers, o i lea o le a agai i ai i latou e saili fesoasoani, saili malamalama ina ia maua ai le silafia ma le iloa e faatino ai vaega nei, aemaise ai o le tausaiaina ma le vaai o masini nei o le a faaoo mai.

O a tatou avanoa faa-aperenitisi. E tatalo ma le agaga o le lototele ma le loto faaloalo ina ia tausolomua tatou Matagaluega, o Faalapotopotoga ina ia faapenaona o faamalosi i latou, ina ia faapena ona o atu e faaauau a latou aoaoga i le vaega o le PSET, o aoaoga faaauau.

O le vaiaso na tea atu nei sa ou auai atu ai i le sainiga o le maliega faaauau a le SQA, o le APTC ma le NUS, o lea ua toe faaauau le fesoasoani a Ausetalia. O i o

le a mafai ai ona agai atu i ai le toatele o i latou e mafai ona faaauau ai a latou aoaoga, e pei o le palama o le inisia, o le faaeletise o le faakamuta ma le anoano. O le fesoasoani ua tuu mai ia i tatou ia faaoga. E leaga a ola aoaoina ma atamamai e mafai ona faatino ai le manaoga o le tatou Malo ma vaega o lo o manaomia.

O le Matagaluega o Tau'i mo Faalavelave Faafuasei. O le manaia ia o le fesoasoani a le NPF, manaia foi le faamaite. Ae i ai foi se talitonuga ma le tuualalo, e uma ane lava lou olaga faigaluega ua e ausia le 55 tausaga, ae le i faapena ona afaina oe i se faalavelave. O lona uiga o lau tupe lea ua e fesoasoani ai i le isi ou uso, le isi tagata. Ae a ita? Ae a ita? O se tau'i lena o se tatalo lena. Ae a sina vaega o la ta saofaga mai lena i tolusefulu ma ona tupu tausaga. E le ono maua ai se fesoasoani mo ta ita, o le tatalo lena.

Ona ou oo mai lea i manaoga o le itumalo, o lea ua saunoa na o manaoga fou, a o manaoga faaopopo. O le tatou Samoa Land Corporation, le afioga i le Minisita, o Nofoalii a faataunuina nei le faamoemoe lea o le miliona mo poloketi i tua i itumalo, ua le iloa po o fea le fanua, o le a faapena ona faatino. Aisea? O tai i le aai e faapea le tele, ae oo atu i uta ua faapenei. O tuamaota ma tualaoa, seia paia lava le falepuipui i Tanumalala, o le vaega lea e tatalo atu ai ma le agaga faaaloalo. Ina ia mafai ai ona tino le faamoemoe ma le manulauti o lo o tatou tulimataia, ia atinae o tatou itumalo, ina ia faatuputeleina le tamaoaga. I lo outou pasi atu ma lo outou agai mai, ua outou silasila i luga i le gataifale, mai lava i le vaitaimi o taaloga sa o tatou talimalo ai. E masalo e na o le nuu lava lena e ese foi ma le matautia o latou foi tapenaga ma le latou foi faamaite. Ma lou talitonuga e tasi lea faamaite ma lea vaaiga na matuai tele mai ai turisi mai totonu o le tatou atunuu. O lea foi ua outou tagatagai i lena i vaitau, ua sui foi le vaaiga, ua sui foi.

Lau Afioga i le Minisita o Turisi, e i ai se fesoasoani, e i ai sau faamaite ina ia faapena ona tupu, tele ma matagofie ma mautu sia foi faamaite. Na saunoa le sui usufono ananafi, o Nofoalii ua au le auala i uta, le auala lea mai Aleisa. Sa ou le faalavelave i ai, ona o le saunoaga faataupou. Ae ne i te i ua ela ai le silasila a le Afioga i le Minisita, leaga o lea ua e asia sao lava lou nuu, e leai se auala a Nofoalii ua oo i le auala faalava lea. E na o Fasitoo-uta, Faleasiu ua oo i le auala lea. E na ona ou faamanatu atu, e le o se talosaga fou, ae o le faaopopo atu, ia ma le faasao o saunoaga, ina ne i ave seseina ai lau afioga.

O si ou nuu o Leulumoega o lena ua taoto atu foi ua uma ona asia vaega e pei ona manaomia ai. Ae ou te talitonu leaga e fua lava i le aofaiga o le seleni ua i ou aao. E ui lava ina tatou faitau, ua se taimata, ua se taitaliga foi ae aoga foi le tuitui pea, tuitui pea, e toina mai i se taimi lava e le toe mamao.

O lo o i ai nai fale komiti o si o matou nuu o Leulumoega, e 3 fale komiti. Lau Afioga i le Minisita o Tina ma Tamaitai, o le saoga e \$10,000 le fale



komiti, lea na e saunoa i ai, ina ia manino ona o lo o faapena ona faafofoga mai ma tuu mai le latou talosaga, i lau Afioga i le Minisita.

Ona foi mai lea o se leo i lau Afioga i le Fofoga Fetalai, e pei lava ona matou fai atu, e fua lava le ta i le tea. E fua lava le tatou galulue ma le faatinoga, ma le tatou manaoga i le tamaoaiga ua i o tatou lima. Ae ou te talitonu o le faatinoga ua tapenaina e le Afioga i le Tamaitai Minisita ma le mamalu o le Matagaluega, ua tapenaina lava ma le atoatoa. O le latou talitonuga o lo o gafataulimaina le tatou tamaoaiga e faatino ai o tatou manaoga.

Faafetai tele lau Afioga i le Fofoga Fetalai mo le avanoa, faafetai foi le paia o le Maota. Ia tau ia ia manuia le faigamalaga a lo tatou Taitai le Afioga i le Tamaitai Palemia, ina ia faapena ona i ai le taeao o muamua, toe taliu mai ma le manuia, faafetaia le Atua. E faapena foi lena Itu, ina ia faapena ona atoatagi lo tatou faamoemoe, aua le tatou velogaaso. Ia manuia le Fonousu a Samoa, soifua ma ia manuia.

**FOFOGA FETALAI:** Ua faamalo faafetai saunoa i lau afioga i le sui usufono mamalu o Aana Alofi 3. O lau afioga foi o le Minisita Lagolago o Aoga. Ua malo saunoa faatamalii, faafetai foi mo le fesoasoani foi aua le tatou Tala o le Tupe, aemaise foi o nisi o manaoga o lou itumalo. O lea lava ua faafogafoga atu le tatou Kapeneta, ua faamauina foi faamoemoega taua ma faamoemoega lelei o le itumalo. O le mea lea, malo lava saunoa faafetai foi faasoa, o lea foi ua lagolagoina le Tala o le Tupe, faafetai.

O le avanoa lenei o se tasi o sui usufono o le Maota. O lea ua matau atu o lea ua fou mai le sa o le afioga i le tiakono toeaina. O le sui usufono mamalu mai Gagaemauga 2.

**Tofa SEUAMULI FASI TOMA (Gagaemauga 2):** E faafetai i lau Afioga i le Fofoga Fetalai i le avanoa foi o lenei itumalo. Ia e poia foi o le tai papau e avatu ai foi ni nai motugaafa aua foi le Tala Faatatau Autu o le Tupe 2022/2023.

Lau Afioga i le Fofoga Fetalai, ou te muai faatulou atu i le paia o lenei Maota, i le afio o lau afioga i le Sui Palemia ma le paia o le Kapeneta. Afio lau afioga i le Sui Taitai o le Itu Agai ma le paia o sui usufono mamalu o le Palemene. E faatulou atu le tapuaiga a Ofisa Sili o Pulega o Matagaluega aemaise Faalapotopotoga Tumaoti a lo tatou Malo. O lau susuga i le Failautusi ma le Ofisa o le Fono Aoao, ae a le paia o malu o le Malo aua le puipuiga o le saogalemu o lenei Fonousu.

Ou te faatalofa atu i le tapuaiga a Samoa aoao, aua le tapuaiga a lau Afioga i Le Ao Mamalu o le Malo ma lau Masiifo. Ae a lau Afioga i le Sui o le Fono o Sui Tofia ma lou faletua. Lau Afioga i le Faamasino Sili, le paia i Alii ma Tamaitai o le Faamasinoga.

O le paia lava lea aua le afio o Tama ma o latou Aiga, o Aiga foi ma a latou Tama, le usoga ia Tumua ma Pule, Ituau ma Alataua, Aiga i le Tai ma le Vaa o Fonoti.

Le tapuaiga a nai o tatou uso i Sasae, le Faigamalo a Tutuila ma Manua, Sua ma le Vaifanua, Fofu ma Aitulagi, Saole ma le Launiu na Saelua, ae a le paia i le afio o le Laau na Amotasi, Faatui o le Tootoo ma le mamalu ia te oe le Manuatele.

E le faaitiitia le faatalofa atu i le tapuaiga a Taitai o Ekalesia, aemaise o le au nofotatalo i so o se fatafaitaulaga, e le gata i Samoa nei ae faapea foi atunuu e mamao.

E faatalofa atu i le tapuaiga a Samoa aoao, o lo o faapea ona tapuaia faiva o lenei Palemene, o lo o tapuai mamao mai i so o se tafa o le lalolagi.

E le galo lava Afia i si ona vao i le tapuaiga a si ou itumalo, Gagaemauga 2. E pei lava ona matou talanoa atu e le fou i la outou faafofoga lou leo, o le ao o le po, o le po o le ao. E tatou te mafuta i aso uma ma vaiaso uma, ua malo le tapuai.

Le paia o le Aiga Sa Peseta ma lo outou Maopu, le afio o Maiava ma le susu o Mataia, le alalatai o le mamalu o le Faleiva, Matautu ma le mamalu o Falefagamalo. Ae a le tapuaiga a lau tofa le Aitutagata Mauigoa ma le mamalu ia Satoalepai.

O le tapuaiga a le aufaitatalo a lou itumalo, o nai ou tama ma tina matutua, le ituvai o faletua ma tausii o saoa ma tamaitai, seia oo lava ia tatou fanau. Ia tapuai maia ma fai so tatou sao aua le lufilufiina o le tamaoiga i le Tala Faatatau o le Tupe, 2022/2023.

O le aso 27 o le masina fou o Iulai, e atoa i ai le tausaga talu ona ou ulufale i le Faigamalo lenei, aua le faatautaiga o le sa o Samoa i ana upufai, aemaise o le tau faasoasoina o lona tamaoiga. Ae a fua i galuega lea ua mafai ona faatino i totonu o lenei 11 masina, e momoli atu le agaga faafetai. E manatu lava tatou te le o mafuta ma le afioga i le Taitai o le Malo, lau afioga i le Sui Palemia ma le mamalu o le Kapeneta, malo le lototele, malo le onosai. O le molimau a lenei itumalo, e fetaiai lava le fia fai measili ma luitau, aemaise o le uisa mai o tagata, folau pea ma le faatuatua i le Atua e manuia ai outou faiva.

Lau Afioga i le Minisita o Tupe, faamalo faafetai, le paia o le Aiga Kapeneta aemaise le Matagaluega o Tupe, mo le tapenaina o le Tala o le Tupe mo lenei tausaga. Ua malo le limalima malo le tauatai.

Ona amata atu lea o se upu a lenei itumalo, lau Afioga i le Minisita o Tupe, e faafesili atu po o fea ua fai i ai tusi talosaga e uiga i pasi. Ou te iloa o pasi, afai e faamatuu atu i le taimi lenei, o lona uiga e tasi lea vaega e fai ai ofisa o itumalo. Ou te iloa e leai se pasi o toe lelei i lenei vaitaimi. O lea lava ua ou tulai mai loa avatu le talosaga i le pasi, o lea e oo mai i le aso, e le i tali mai lau afioga i le Tamaitai Minisita.

O aseta a lo tatou Malo o lo o i Vaipouli, e fesili atu i le afioga i le Minisita o Aoga, e le o i ai sona silafia i lea vaega. Lau afioga i le Minisita o Tupe e uiga i aseta nei, o lea ua se vaitau o le 8 tausaga talu ona le toe faia se aoga i Vaipouli. E vaai lava ma le momomo o le loto i nei aseta taugata. Ua maumau apa, maumau laupapa, ua sosolo ai le vao vaeatu le paia o le Fono. Lau Afioga i le Fofoga Fetalai, maumau nei aseta taugata a le Malo. O le talosaga a lou sui usufono, e a pe a faamatuu ane mo lenei itumalo na e tafalalata ane. E faasoasoa mo nai aiga e le o lava le faasoa, e fai ai ni o latou faleapitaga. E le faapea e fai atu le sui usufono e manao i ai le sui usufono. Ua lava ma totoe nai faleoo o lo o i ai e nofo ai le sui usufono latou, ae o le lautele o le itumalo, lea e avatu ai se talosaga lau afioga i le Minisita. E leaga e le o se mea lelei le mea lea o le tu ia matou o le faleaoga, ae omai nisi itu o le motu i Savaii, tala ma lau. O le mea lea ou te talosaga atu ai i lau afioga i le Tamaitai Minisita, se i silasila ae i lea vaega.

Lau Afioga i le Minisita o Faatoaga, faamalo faafetai i le taulamua i le taumafaiga o le gagauina o le vao. O le iuleo lava lea ta te faalogo i ai ua taugata le soifuaga. E leai se atunuu e le tamaoaiga i le laueleele e pei o le atunuu lenei. E na ona toto lava nei, ola taeao, selesele ia Setema po o Oketopa, o faamanuiaga a le Atua. Ia o le a le mea o le a mafai ona fai pe a fai na o le taoto? taoto ma faatalitali i le Malo. Ia toaga e gagau le vao vaeatu le paia o le Maota. Ia fafaga povi, fafaga puua, fafaga moa, mea lea e tua i ai le matai Samoa. Ae o le tulaga e pei ona i ai ua taugata le pusamoa, taugata le pusa mamoe. O lou lava sui usufono leaga o le matai tautua, o lea o le a atoa lou 60 tausaga, lea ua oo mai iinei i upufai a le atunuu lenei, ae ua leva ona tautua. Na amata mai i tua i le tunoa, lea ua faaiu mai i le fale o le atunuu.

O tulaga i le aso lau afioga i le Minisita o Faatoaga, silasila ane i le niu, po o le a se metotia a lau afioga i le Minisita, e toe to niu atoa ai le atunuu. A silasila i tuamaota ma tualaoa i so o se afioaga o le atunuu, o le matua vaotu le mea vaeatu le paia o le Fono. Lau Afioga i le Fofoga Fetalai, o le niu i lou lava talitonuga, o le tamaoaiga lea o le atunuu, ma e au tupulaga, e au tupulaga le niu. Lau Afioga i le Minisita, se i silasila ane lava i le tafa lea, po o le a sau metotia, a o le a sau auala e faaosofia ai le mamalu o le atunuu, latou te toe totoina ai le niu.

O le tulaga i talomua, faamalo faafetai, ua vaai lava ma le fiafia o le loto. E i ai foi le talitonuga o lenei Matagaluega, a le malu Sui o le nuu, ma Sui tamaitai, ma faamalosia le nuu e o e galulue, e le fua mai faaeleeleaga ia, le uluai seleselega e pei ona saunoa i ai le Minisita. O le mea lea lau afioga i le Minisita, o nai vaega ia.

Lau Afioga i le Minisita o le Soifua Maloloina, o le falemai lava lea i Vaipouli, o le falemai lea ua fai si mafatia o le matou itumalo e tau totogi faauma le loan. O le mea lea, e talosaga atu i lau Afioga i le Minisita se i silasila ane. Ou te le iloa po o le a le mea ua le toe sau ai se fomai i Aso Gafua, e vaai gasegase e pei o le mea sa i ai. E po o le mea o silafia e lau

afioga, po o le mea o lo o fai lava i tua. O le upu o lo o aumai, o tulaga lava ia na i ai le Koviti-19 ma vavao na amata mai ia Mati, lea lava o le a faasolo ai lava. O le mea lea lau Afioga i le Minisita, o le talosaga lea.

O le fale faamamatoto i uta i Motootua, ou asiasi atu i le isi aso, e vaai lava ma le faanoanoa, e tuai le fale. Ae toeitiiti lava a le iloa atu totonu o le fale i le vaoo. Lau afioga i le Fofoga Fetalai, ou fesili atu i le isi tamaitai fomai lena e i ai, e sau le tamaitai na te le silafia au. Na fai mai, faamolemole tama e...ou fai atu, o e silafia o au o le faipule. O le a le mea ua le faamama ai le mea lea? ia toe mei loa. E le aoga le o atu i tua o le Matagaluega o le Soifua Maloloina, e vaai le tumama i nuu i tua, ae oti atoa totonu o le taulaga. O le mea lea lau Afioga i le Minisita, ne i mea ane ua e aapa i tua, ae galo ai totonu i le siosiomaga o le Matagaluega. E momoli le agaga faafetai i le afioga i le Alii Fomai, le afioga ia Fuimaono Aleki, e malaga atu lava i Savaii i le faaiuga o le vaiaso, ua tau leai ni mai e aumai i Tumua nei, e fai togafitiga. O lea lava ua malaga atu lava i Savaii i se auala faafaigofie i le fomai, aua le faiga o togafitiga a tatou i Savaii. Lau Afioga i le Fofoga Fetalai, e momoli atu ai le agaga faafetai i lea foi tamalii o le atunuu. Lau Afioga i le Minisita se i silasila ane, i se taui talafeagai mo lea foi tamalii o le atunuu ma lana auaunaga. O le faamanuiaga lea tatou te avatu e tali mai le Atua, ae umi lava o faatali, ae o se taui talafeagai i se taimi vave, o lea e tau avatu ai se talosaga.

Lau Afioga i le Minisita o Leoleo, na sau foi i lau upu talu ai le lipoti, o lipoti o i latou e malaga i fafo i so o se mafuaaga. O le tulaga o lo o i ai e malaga mai i Savaii, ae 3 aso e faatali ai. O le a se silasila a lau Afioga i le Minisita i se auala faafaigofie mo i matou i Savaii. Aemaise o le pau mai lea pe 2 ni nai aso e faatali ai ma maua. A o le tulaga i le auaunaga a le Matagaluega o Leoleo, o si matou foi pou i Fagamalo, ae tainane foi si o matou motu i Savaii ma Upolu nei, e momoli le agaga faafetai i le soifua tautua a malu o le Malo. E pau lea o le mea e talosaga atu ai, e lagona lava le momomo o le loto i nai leoleo i le faalo pe a ou alu atu. Ae o le faalo foi e le alu fua, e le alu fua le faalo, e tatau foi ona tuu atu sina mea leaga o tatou o matai, e faapena lava le...ae talosaga i le malu o le Malo, afai foi o ni aga masani, o lena e i ai a outou afioga i Minisita. A o matou nei o sui usufono, se i faalo foi pe a oo foi i le matou taimi matou te Minisita ai matou.

O le Minisita o Galuega, o le vaiaso talu ai, e alu atu le taufetuliga a loli a le kamupani a le Otto, aemaise o le loli ka. Na fesili lou mafaufau po o i ai se auala o faata i le itu lea i sisifo. Ma lou alu atu i le matou polokalame na fai i Papa, o i i le faaitu lea i sisifo. Ae na o le faga lava o le ta, alu ma le maamaa ae tumau lava le omoomo, le mea lea o le galugalu e tusa e leai se mea. E na o le faga lava o le ta, alu ma le maamaa ae tumau le omoomo foi lea e galugalu. E fou luga ae tuai lalo. E pei lava o le tagata foi lele e taele le ulu ae le taele vae, vaetu lau Afioga i le Fofoga Fetalai ma le paia o le Maota. Lau Afioga i le Minisita po o e silafia lea mea. E ala ona...o le

maumau o tupe a le Malo. O le galuega lea e i talaatu o Sitivi, lau afioga i le Minisita, faafetai tele lava.

**Tofa Hon Olo Fiti Afoa Vaai:** Lau Afioga i le Fofoga Fetalai...

**FOFOGA FETALAI:** Ia se i fai mai se malologa a le sui usufono, leaga o lea ua taua le suafa o le Minisita o Galuega tetele.

**Tofa Hon Olo Fiti Afoa Vaai:** Ia tulou lava le mamalu o le Maota, o au e taele lava mea uma, o lalo ma luga ma mea uma lava. Ae ou te talitonu o le auala lea e taua e lau afioga, o le auala tonu lava lena na fai e Pese, pe ua fai faafa ea e Peseta e le lelei. O lea la ua taumafai atu e tau faalelei le auala lena e i talaatu o Manase, lea e i ai le mea lea e pei ona taua e lau afioga. Oi ona o lea ua le i ia...ia o le mea lena. O le tele ia o tupe a le Malo na alu i le kamupani a Pese lea ae le lelei ona fai. Ma le faaaloalo.

**FOFOGA FETALAI:** E leaga o lea e le o nofo mai i i le sui usufono.

**Tofa Hon Lauofo Fonotoe Nuafesili Pierre Lauofo:** Ioe lau afioga i le Fofoga Fetalai, ona e le o i i le sui usufono mamalu. Ae tau ina ou faamanatu atu i le afioga i le Minisita, masalo ua 20 tausaga ua le toe faia e Peseta ni auala.

**FOFOGA FETALAI:** Ia malo faafetai, o lea foi ua faafofoga mai lau afioga i le sui usufono, o lea ua manino lea tulaga. Ae faaauau mai le saunoaga.

**Tofa SEUAMULI FASI TOMA:** Ia faafetai, ou te malamalama i le kamupani na faia talaatu o Sitivi. E leaga toeitiiti atoa le tausaga. E le i atoa se 10 tausaga o le galuega lea, ae ua matua omoomo leaga lava. O le ala foi lea lau afioga i le Fofoga Fetalai ma le paia o lenei Palemene, o tupe maumau a le Malo. E leaga o lea e le o afio mai i le sui usufono mamalu, o le tulaga i le... lau Afioga i le Minisita o Galuega, faafetai tele lava, e tele o au tusi talosaga e avatu i lau afioga, ua pei oe o sau teine foi lele, e tusi, tusi, e i ai lava le tusi ua tali mai, ae i ai lava le tusi e avatu ua le iloa po o fea se mea ua oo i ai. Ae faafetai i lau afioga i le Minisita e tusa ai ma le tali mai o tusi. O lea lava e nofo le matou itumalo aemaise le matou pitonuu o Safai.

**Tofa Hon Olo Fiti Afoa Vaai:** Lau Afioga i le Fofoga Fetalai,

**FOFOGA FETALAI:** Se i tulai mai lau Afioga i le Minisita.

**Tofa Hon Olo Fiti Afoa Vaai:** O le mea e fia faasao, ou te le iloa po o fea lea e agai i ai tusi a le sui mamalu, e masalo o lau failautusi ae le o au lea e....

**FOFOGA FETALAI:** Ia fai ma siaki au tusi po o oo lelei i le Minisita.

**Tofa Hon Olo Fiti Afoa Vaai:** Lau Afioga i le Fofoga Fetalai, ou te faaamua i le sui usufono mamalu, e na o le sau lava nei toe tali taeao lana tusi. O au e toetiiti atoa le 20 tausaga e le talia sau tusi. O le mea lena e faamanatu atu ai i lau afioga, aua e te popole, e 5 foi tausaga o Papalii ia e le taitai talia sau tusi.

**FOFOGA FETALAI:** E leaga o lea ua taua lou suafa, ia manatua foi lau Afioga Papalii, o lea ua e Tapunuu i le taimi lenei.

**Afioga Hon Tapunuu Niko Lee Hang:** E 2 mea sese na..., e sese lana igoa la e tau, ma e sese foi lana tala lea e fai. E ma te le fetusia lava ma lea tagata.

**Tofa Hon Olo Fiti Afoa Vaai:** Lau Afioga i le Fofoga Fetalai, o Papalii na ou fai i ai e le o Tapunuu.

**Afioga Hon Tapunuu Niko Lee Hang:** E le afaina, ae pau le mea lau afioga i le Fofoga Fetalai, e ma te le fetusia lava ma le afioga ia Olo. O le sao lea o lau tala lea na...e le o oe o se teine o le a ou tusi atu ai.

**FOFOGA FETALAI:** Ou te iloa o lea ua manino lea tulaga. O ala o fetusiaiga lau afioga i le sui usufono mamalu, fai ma siaki au tusi po o oo lelei i le Minisita.

Ia faaauau mai le saunoaga.

**Tofa SEUAMULI FASI TOMA:** E faafetai i lau Afioga i le Fofoga Fetalai, e le fou i lou sui usufono le fai tusi. E faafetai i le afioga ia Tapunuu vaeatu lava le suafa Papalii. Aua na tali lelei mai le susuga a Papalii i lau tusi lena na aumai e uiga i le matou auala. Ona avatu lea o le iuga a le Kapeneta ia Fepuari 2020, o le auala e alu atu i Satoalepai, taamilo ae tau i Fagamalo i le Lagoto. Ae fai atu le auala, e na ona alu atu lava uma i Satoalepai, o atu loa toe amata atu i le Lagoto, ae fai mai o mita na totoe i Satoalepai, lea ua fai atu ai i. Ona alu atu loa, e na o le tasi le kilomita la e...ae le i faia le isi 1.2 kilomita. Ia Papalii, faafetai tele lava, o lea la ua ou tatalo i le Afioga i le Minisita, fai mai o le iuga a le Kapeneta fai mai a fai loa, e le toe suia e se isi. Ae faatoa ou iloa lava lea ua sui e le sui talu ai, ia le faaiuga lea a le Kapeneta. O le mea lea lau Afioga i le Minisita, o le toatele

o le matou nuu ua nonofo i uta, o le matua toatele lava. O le vaega lea o le auala silasila ane, afai foi ua utiuti lau faasoa, e tusa lava pe na o le alu atu o le masini e sua, e aveese le ta, ona ua tele ina leaga. E tusa ai lava lea pe aipefu ai lenei nuu, alu faatasi ai lava. A ia lelei le feoaiga.

Lau Afioga i le Minisita vaeatu le Fofoga Fetalai, ma le paia o le Palemene, aua ou te iloa o le lauga mulimuli lava lenei o lenei po. O le tulaga i patupatu..

**FOFOGA FETALAI:** Ia malie le sui usufono mamalu, se i tulai mai le

**Afioga Hon Tapunuu Niko Lee Hang:** E le faalavelaveina le lauga matagofie..

**FOFOGA FETALAI:** O se mea e fia faasao po o se mea e fia faamalamalama.

**Afioga Hon Tapunuu Niko Lee Hang:** E leai, leaga o la na tau mai au i lana lauga. O lea la e acknowledge ia le... faafetai i lau afioga, o le tou itumalo, masalo o le itumalo lea i Salafai e tele ia o galuega na fai i lou taimi, ona o mataaga ga i vaitafe e feoi ai laumei, o le isi mea na na ave i ai le faamuamua i lou itumalo.

Pe faa-2 pe faa-3 ona ta lou auala i le agai atu lea i... o lea la e te faafetai mai e manaia le galuega sa fai, gi mea o totoe o le afioga ia Olo

**FOFOGA FETALAI:** Ia leaga o lea ua e toe taua ia le afioga a Papalii talu ai ia...

**Tofa Hon Olo Fiti Afoa Vaai:** Lau afioga i le Fofoga Fetalai ona o lea ua taua lou igoa...

**FOFOGA FETALAI:** Saunoa mai lau afioga i le Minisita.

**Tofa Hon Olo Fiti Afoa Vaai:** E ma te au faatasi ma le afioga ia Tapunuu i le tulaga e pei ona taua e le afioga i le sui usufono mamalu. O i i le faaitu lea e sao ai ia le saunoaga a Tapunuu, e tele lava ia le tulaga o le atinaeina o aualagalua ma mea faapena.

E moni o le auala lea e saunoa i ai le sui usufono mamalu, na ou alu atu e tatala le galuega sa faatino e Tapunuu, ua faa-3 ai lea ona fai. Ia o le mea foi lea sa ou faamalulu ai i le uso a sui usufono, e onosai mai, ae se i faao se faamuamua i nai isi alalafaga i auala e le i faia muamua. Ia ae tuu ia lana faa-4, ia se i maua se taimi se i maua se tupe, ia ona fai lea o lana faa-4. Ia se i...

Ae aua le mamafa tele i lou finagalo ia le palota faapea e... leai e te tulai lava oe ia ona o lau tofa faaali i totonu i i. E te le malo i ni auala. O le tofa lava ma le faautaga a lau afioga lea ua faafofoga ia le itumalo, e maoae ma ailoga e toe i ai se suiga e toe faia.

**FOFOGA FETALAI:** Ia talitonu foi lea ua talifuaitau le afioga i le Minisita, ia o lo o faasoa lava le afioga i le Minisita mo le tatou atunuu. O le mea lea ia o le mea sili lea ua e faafofoga mai i le saunoaga a le Minisita ia o lo o faasoasoa aua foi ia le lautele o le tatou atunuu. Ia ma lou foi itumalo i se taimi.

Ia faaauau mai ia le saunoaga.

**Tofa SEUAMULI FASI TOMA:** Ia faafetai i le afioga i le Fofoga Fetalai. O le tulaga i patupatu, ia o le Ekalesia lea VOC i Saleia, o le latalata ia i le auala. Ia e avatu le talosaga e le aoga le tupu o le faalavelave faatoa avatu le talosaga. Ae e lelei le avatu o le talosaga ae e le i tupu se faalavelave. Ia tupu ae se faalavelave e uiga i fanau Aoga Aso Sa ma lotu i afiafi po, i se isi e aafia ai le soifua ma le ola, ia ae o lea ua avatu i lau afioga i le Minisita aemaise lava o tatou patupatu ia i auala i Savaii, e eseese lava ia ata o patupatu.

O le isi patupatu ua tele tele i luga le ogamanava vaeatu le paia o le Fonousu a Samoa. Ae o le isi patupatu o le manaia ia o le... aemaise lava mo taavale laiti.

E pei lava ona ou fai atu o lea o le a 60 nei o ou tausaga ae faatoa ou fealuai lava lea i se taavale fua e fealuai fua a le Malo. E le gata i le taavale ae o le utu fua semeamanu lava le mea a ta oti ta te le i fealuai i se taavale e utu fua e le Malo. Ia o le mea lea...

**FOFOGA FETALAI:** Toe 2 minute o le sui usufono.

**Tofa SEUAMULI FASI TOMA:** Ia aemaise lava ia o taavale ia a matou o le a lava le... e ala la ona ou talosaga ona ua taugata ia parts o taavale. O le mea lea lau afioga i le Minisita se i silasila ane i patupatu ia o auala i Savaii. E manaia le alu atu i Apia i Malua e laugatasia lava patupatu.

**Tofa Hon Olo Fiti Afoa Vaai:** Lau afioga...e na o se mea e puupuu lava le faamalamalamaga.

**FOFOGA FETALAI:** Ia saunoa lau afioga i le Minisita.

**Tofa Hon Olo Fiti Afoa Vaai:** E moni le saunoaga a le sui usufono i le eseese o specs mo le faiga o patupatu. Ia po o tatou humps foi ia. A silasila lau afioga ma le mamalu foi o le atunuu, e ese le maualuga o patupatu ia e



fai i luma o faleaoga, ia ma luma o falesa, ia ma luma o atinae foi ia o turisi ia na e te silafia e fai lava si maualuluga ina ia taofi lelei ai ia taavale. A o isi la patupatu foi ia, e le pei na o sina slow lava toe alu. A o patupatu ia e faamaualuga lea e ese ai lau silasila, ia e manaomia lava le sefe o tamaiti aoga, o tamaiti ma fanau foi i Ekalesia ma luma o malumalu. Ia faapena foi luma o aemaise lava ia le tou itumalo aua e tele ia outou atinae turisi o lo o i ai o lea e pipii mai i luma o le auala.

Ia e pei o se faamalamalamaga na lau afioga ae faafetai mo le finagalo faaalua.

**FOFOGA FETALAI:** Malo faafetai ia, faauma mai le saunoaga a le sui usufono mamalu ua toe tasi lau minute.

**Tofa SEUAMULI FASI TOMA:** Ia lau afioga i le Fofoga Fetalai e usitai lava le sui usufono o lenei itumalo. Ia ae silafia foi e lau afioga ma le tofamamao a lau afioga i le Fofoga Fetalai, e tasi lava le leo o lenei itumalo i totonu o le Maota. E le pei o isi itumalo e tai 2 ia o latou sui usufono. Ia ae ui o lea, e usitai lava.

O tulaga i femalagaiga a vaa i Aso Sa lau afioga i le Minisita, ia leai o le talosaga lava ia a tagata e avea ai lou leo e faaleo atu, e a pe a 2 malaga mai i Savaii 2 malaga atu iinei. E pei o le mea sa i ai e 2 mai o 4 atu iinei ia ma le 2 atu iinei ma le 4 mai o, aemaise lava Aso Sa. E taatia atu i ou tafatafa ia aemaise o o i le uafu i Salelologa, o le tetele ia o omoomo ga i le vaega, vaega ga e taunuu ai matou e faatali ai pasese aua o outou ia tou te o atu lava tou omai i le pito lea e faaee ai taavale. A o matou lea e o i le itu lea i tai, ia o patupatu na e talosaga atu i lau afioga e tasi lava sina uta maamaa ia uma.

O le tulaga i le Minisita o Galuega Faavaitaimi ia leaga o lea e le o afio mai ia le afioga i le Minisita, ia ae faafetai tele foi lava mo lea atinae. Ia le Minisita o Faamasinoga Matamua, ia malo faafetai le lototele. O le tele o le suiga ua i ai le Matagaluega i lenei vaiata. O le vaiata i le 1989 ae i ai foi nisi ua avea nei ma Sui Peresetene o Faamasinoga a o faauluulu i ai le Ofisa lea o Faamasinoga, o le faigofie ia toe... o na vaiata i mea ia tau o faamasinoga, aemaise lava mea e manaomia.

O le vaiata i lenei i lata oo mai, ia o le tele ia o le suiga. O le tele o le suiga ua i ai nei, ia e pe na ona matou faapena atu leaga ua leva foi ona ota fai faamasinoga ta ita. Ae o le tulaga lena i lau afioga i le Minisita se i e silasila ane i lea tafa.

Ia leaga o lea ua e saunoa toe tasi ia lau minute, faaiu atu ai lea o sa matou tala o lenei itumalo i lau Afioaga i le Minisita o Tina ma Tamaitai, ia lau afioga Leota, ia faafetai tele lava. O lea ua tino mai ia le laasaga muamua o le tatou poloketi \$200,000. Ia o lea foi o le a faasau ma le \$1 miliona. Ia o i lava o le a iloa ai lau peni. E le faapea foi o le a ave uma ma le atunuu ae tuu ese se isi mea ma taua Minisita ma le Minisita Lagolago.

Ae o le tulaga i le faasoā, faamalo faafetai. E le itiiti lau galuega lagolago foi i le Kapeneta ia faamalo faafetai. Malo le toa, malo foi le lototele. Faafetai foi i le Ofisa Sili o lenei foi Matagaluega ma le Matagaluega o Tina ma Tamaitai, Atinae o Nuu ma Agafesootai aemaise foi o le Matagaluega o Fuainumea Faamauina, ia malo le galulue ia aua foi le tautuaina o le atunuu.

Ia o se leo lea o lenei foi sui usufono, Minisita Lagolago o Tina ma Tamaitai ma Atinae o Nuu ma Agafesootai, ia o le a foi se faafofoga mai o le paia o le atunuu lau tapuaiga foi Samoa ua laavale foi se leo, ia malu ave i fale i tou finagalo se vaivai ma se faatauvaā.

Lau afioga i le Fofoga Fetalai ma le paia o le Palemene, o le a foi se faafogafoga mai ua le tautamalii se leo, ia asu atu vaimalu i puega i le tofa ma outou finagalo. Malilie matou te faamalulu atu foi, ia e tusa ai foi ma se lafoga. O tulaga o le aso i le tapuaiga a si ou itumalo, ia malo faafetai, malo le tapuai mai e tusa ai foi ma le alofaiva a lo outou sui usufono filifilia aua foi le faalagamaea a le atunuu.

Manuia le feagai ai o le Taitai o le atunuu i fonotaga i atunuu mamao, manuia foi le tapuaiga a le Palemene o Samoa, maua se malologa filemu i le afiafi ma le pogisa mamalu mai, matou ola pea i le alofa o le Atua faafetai.

**FOFOGA FETALAI:** Ia ua faamalo saunoa i lau afioga i le sui usufono mamalu Gagaemauga 2, lau Tofa Seuamuli ia po o lau afioga foi i le Minisita Lagolago o Tina ma Tamaitai ma Agafesootai. Ia o lea ua maua lou finagalo mo nisi foi o fesoasoani mo lou itumalo. Ia aemaise foi o nisi aseta taua o lo tatou atunuu o lo o i lou itumalo ia faafetai. O lea ua faafogafoga ia le paia o le Kapeneta, ia aua lava le agai i luma ia ma le faasoasoaina o aseta o le tatou Malo, ia aua ia lo tatou atunuu aemaise o si ou itumalo.

Ia malo le saunoa faafetai foi le faasoā ia aua ia le tatou Tala o le Tupe. Ia ua avanoa foi ia le tatou Maota mo se tasi e saunoa, sui usufono mamalu.

Ia o lea ua matau atu o lea ua fou mai ia le sa o Falealupo. Ia faafetai o lea ua o tatou fono i lenei itula afiafi. Ia malo le onosai. Ia o le avanoa lenei mo lau afioga le sui usufono mai i Falealupo. Ia aua lou sao aua ia le tatou Tala o le Tupe, lau Tofa Fuiono.

**Tofa FUIONO TENINA CRICHTON (Falealupo):** Ia ua faafetai mo le avanoa lau afioga i le Fofoga Fetalai. Ia aemaise foi le paia o le Maota aua lau Susuga po o lau afioga i le Sui Palemia, ia le paia foi o Minisita o le Kapeneta ia faapea foi ia le le Itu o lo o agaia ia le Malo, le Sui Taitai ia le mamalu o le nofo a sui usufono ia o le Palemene o le Malo o Samoa.

Ua se seuga foi ua mataina, ua malo le fai o le faiva, o le lupe sa tu i le tula, tu i le lima i le afiafi lenei. Ua se vaioto foi o Naifia a o se anava o le lupe na i Tapuamia, ua o tatou maua ia lenei itula i aao faaloaloa o le agalelei o le tatou Matai Sili. Ua seu ia le inailau na oo i Malo, ina ua seenoi manaia le

lupe ua lele tu i Malie aua le taeao ma le faafogafoga aua lauga o le aso. O le matagofie ma le faalogo, o le taua lea i le vaai i lea itu ma lea itu, felafolafoaiga i le matagofie.

E ui lava ina i ai nai taimi e tau toa ai, ae o le toa lava a le tamalii e fofu lava i le tofa. Malo faafetai.

O le lauga foi a Falealupo leai o lo o faalogologo mai foi ia lou foi itumalo ia aua le nofo tapuai o le Tupu Faanofonofo. Ia o le Paia o Aiga, ia aemaise foi le Maopu ma le Matua ia Lamositele. Ia ao se faalogologo o le Falefa i le tapuaiga, e tasi lava ia ia Samoa, leaga o mea ua avatu, e tapuai faiva o le atunuu.

O le matagofie e faapena ona i so o se itu e ta ai ia lona faamoemoe. O le Tala Faatatau Autu o le Tupe 2021/2022, po o le 2022/2023 aua le aso lenei ua o tatou i ai ia i lona faatinoga. Ia o Falealupo ia ma faalogologo, ia e muamua lava ona pasia e Falealupo ia le Tala o le Tupe a o le i faia se upu, aua foi ua lava ia fetalaiga ma saunoaga. Ia e malie lava i le faalogo, le faatinoga o mea lelei, ia aua le tau atinaega o si o tatou atunuu.

Ia ae talitonu foi, ua tele tala i le taugata o le soifuaga ua i ai lenei vaitau. Ia ae e leai ua ala la ona taugata ona o meaai a papalagi ia e lau mai i Samoa, ioe. O mea sao lava ia mea, aua a na le lau maia ia meaai mai i fafo, ia o lea ua masani lava tatou i si faalifu, ma le koko ia ma si tamaimoa se i tulou. Ia faia le supo ona uma foi lea o lona aso, leai se tupe e alu ai.

Ae a faasoa loa meaai mai fafo a papalagi, ia o le pusa mamoe ia ua toetiiti lava \$500.00, po ua \$500.00 lava. Pusaipi ua faapena. Ua o tatou lagona le mafatia, ia ona o tulaga o fuafuaga faa-faigamalo ia ona o le aumaiga o mea mai i fafo, ia aua le fesuiaga o tulaga tau taumafa. Ia o le lagona ia ma le vaai, e le toe alofia na mea. E tatou te o lava i le tuugamau o le tau lava ua alu i luga. E le toe mafai lava ona toe i ai se tomai faapitoa seiloga o fomai mamao mai i o, ia aua le fomaiina o se tamaoaga, ona tau maua lea o se fua laitiiti, e tau maua ai se fesoasoani.

Se i fai atu lava lau faafetai i lau afioga i le Minisita o Tina ma Tamaitai, ua maea le fale o Falealupo. Faafetai mo le faataunuuina o lenei foi poloketi e taua ia. O le tulaga foi o lo o i ai le fale o lenei nuu, o la ua amata ona feei ai masini i totonu ua taunuu atu ma faatotoga na o le fale. Ua amata ona faaoga, ia e ui lava o la e le i umusaina le fale, ia a la ua i ai ona masini i totonu e faatino ai.

O le mea lea e faafetai ai i lau afioga, ia ona o le vave o le faapolokalameina, o ia vaega taua ua mafai ai ona laalaa i luma le vaai. Ia aua a tatou nofononofo ai i se mea e tasi, e na o le feei feei feei lava, ia e oo lava ina faavaivai ai ia se mea lelei, ia o lo o taumafai. O na e avatu ai se faafetai tele, o nisi lava nuu e le i faatinoina ia latou fuafuaga, ia ou te lagona o lo o taumafai uma ona e taumafai se mea e lelei mo afioga taitoatasi.

Ma o lata foi tilotilo i ia mea e tatau foi ona faamaumau e lau afioga, o le nuu lava ua maea ia le latou fale ma faatino ia latou fuafuaga, ia faasau loa

ma lana \$1 miliona ia aua o lea ua... e manino lava le pasia o le Tala o le Tupe ua toetiiti. E pei o le tilotilo lena i ai ia agai i le faasologa o fuafuaga.

Faafetai i lau afioga i le Minisita o Tupe, faafetai tala manino tala malamalama. E ui lava i le faafofoga foi i lenei po po o lenei afiafi, o nisi o tulaga o le tala pau o le Tala o le Tupe, ni tulaga faaneionapo, ia ae e pei lava ona ou fai atu, ua le toe alofia le mea lena i soo se atunuu. Ia ua sao lava nai upu ia e feei ai nai Ekalesia foi ia, leaga ua i le faitotoa le tama.

Ua le toe mamao le taimi, o le taimi lenei, tatou faasaga e tali faigata, aua tatou te loto vaivai, fesoasoani lava le Atua ia Samoa leaga o lona Faavae lea. E Faavae i le Atua Samoa mai lava anamua. O le ala foi lea o le faafaigofie o le Talalelei ia Samoa, ia leaga o lo o tatou feoai faatasi ma lo tatou Atua.

Ia faafetai i lau afioga i le Minisita o Tupe mo ia vaega taua mo le faaleleia aua le Tala o le Tupe.

O le Minisita o Aoga lau afioga, o lea o lo o taumafai ia si o tatou itumalo. Ae o le mea o lo o taoto ai le tatou itumalo mai Falelima, Neiafu, Tufutafoe ma Falealupo, e fau se isi faleaoga i le mea la ua amata ona sua. O la foi ua faataoto i ai le malae. Ia leai e tuu atu i tafatafa o lau afioga, se i e silasila ane i ai, ua mamao tele Asau ma nai a tatou fanau. E usu mai i le taeao po, e taunuu ua ta le 10:00 i le taeao ia alu atu ua le maua ia le amataga o aoga pe afai e le maua ni auala. E tilotilo faapena i le taumafai ina ia faafaigofie tulaga o le feoaiga o fanau.

O mea foi nei ua tutupu ai le tele o le mau faalavelave i fanau tamaitai ia ona o luga o auala e feoai ai. Ae o le latalata o le mea e aoga ai, ia e savalivali lava i ai. Tuu atu i tafatafa o lau afioga i le Minisita o Aoga, silasila ae i ai i si o tatou itumalo ia ua lava le alu atu i Sataua agai i Asau, ia e o latou agai i Matia ma Tiaituau e aoga ai. Ia ae sau agai i Falemoa ia le tatou vaega, ia i le malae o Taatiti ma Tuaiaufai ma Tonumaipea ma aiga, ia e amata ai i ina ia le tatou vaega. O le tatalo lena i lau afioga i le Minisita o Aoga.

Faafetai i lau afioga i le Minisita o Faatoaga ma Faigafaiva, se ua ese lava lenei vaitau i le tele o le Talomua ua faaoso i le gaioga o lo o faatino ai galuega, faafetai tele lava. E le o se mea e mimita ai le faalogo i lea afioga ma lea afioga. Ia o lea lava e tilotilo, o lea lava ua amata le tapenaga a lea afioga ma lea afioga, o mea e tua i ai. Ia faapea ea o fea e tatou te faamoemoe i ai? O le laueleele lava, o le mea lena e faafetaia ai lau afioga i le Minisita o Faatoaga ona o le mataala o lau afioga.

O le vao o le sami aua o le fatu lava lea. O le tamaoaiga i le sami ola ola, e muliga foi le tamaoaiga o le vao i le tamaoaiga o le sami. A oo lava la ina faafailele lelei ia mea laiti faapena, ia ae fua mai lava, e fua mai i lona matagofie ia ma lona lelei. Ia o lena se faafetai i lau afioga i le Minisita o Faatoaga ma Faigafaiva.

Ia lau afioga i le Minisita o Falemai, faafetai i lau afioga. E leai o lea lava o lo o vaai ia le fomai o lo o i ai i lo tatou itumalo. E lagona lava le faafetai tele pe a ota alu atu i le falemai, ia o la o lo o i ai le fomai. E leaga e tele ia lo tatou itumalo e sau mai Asau e tau i Falelima, ia a leai, oi talofa e, e sulu agai i Tuasivi, ia pe sau foi i le Itu o Tane, ia o le taumafaiga na o mea uma e faatino ai le fia maua o le fesoasoani e le tagata soifua.

O le mea lena e momoli atu ai le faafetai tele i lau afioga i le Minisita o le Soifua Maloloina ia ona o lo o manuia ia si o tatou itumalo o lo o i ai le fomai o lo o nofo ai e oo mai lava i le taimi nei. O le tulaga i mea uma i la outou galuega faa-Minisita ia faafetai i lau afioga i le Sui Palemia, e ui lava e le o iinei le Tamaitai Palemia, o lo o i fafo ona o nisi o valaauina, ia leai o lea ua faaauau e lau afioga tulaga o le Fonotaga aua le aso ma lona faamoemoe vaeatu le afioga i le Alii Fofoga Fetalai.

Ia o le agaga lea e faafetai atu ai i mea lelei e faatino ia aua si o tatou i ai i lenei vaitau ia ma lo tatou foi nofoaiga ua o tatou pale mai, ia aua le taumafaiga o le atinae o le tatou atunuu. Ia talosia ia i le alofa o le Atua mo le agai i le lumanai. Ia sagai ane ai o le tai, ia aua ia la outou galuega i le taumafai.

O tumau pea ia le tatalo a Falealupo galuega tetele ona o auala, o le suavai ia atoa ma le paoa. Ua tele lava aiga o lo o faapena i si o matou nuu, o la e le i maua ia le suavai ia atoa ma le eletise. Ua tele foi itu o lo o nonofo uma ai, ia ae e le o oo i ai auala. E pei lava ona tatalo atu ai talu ai, ia e leai e tumau lava ia le tatalo lena i lau afioga e silasila ane i ai i lenei nuu toatasi o Falealupo, e mamao i tai. Ia aua e 5 maila le alu atu i uta i le vai i Falealupo tai. Ia ae o la e o lo o manaia ia le vai, ae ona e le i tofutofusia aua a oo la ina tofutofusia, ia e leai lava se isi mea e na o le faafetai ma pese i le Alii, ia ua taunuu le faaolataga leaga o le vai o le ola lea. O lena le tatalo i lau afioga ia aua le faamoemoe ma ou tiute i se taimi, ia e faatino ai ou tiute aua le valaau i lea itumalo ma lea itumalo.

Ia e pei o le agaga faafetai lena i lenei afiafi i a outou afioga i Minisita ia aua foi tulaga o tou galuega. O nisi Minisita e le i oo atu i ai so matou taofi, ia e talitonu o lena e lelei ma mausali ia outou faamoemoe, e leai se mea o faaletonu ma afaina. O lena e avatu ai se faafetai tele.

Lau afioga i le Fofoga Fetalai, ia malo faafetai mo le tauaveina o le Fono, leai ua uma foi se lagona o Falealupo ia, ia aua se taumafaiga vaivai ia aua lenei aso ma le tatou Fonotaga.

Ae e matua lagolagoina lava e lenei itumalo le Tala o le Tupe, ia manuia lenei afiafi aua le alo atu i le Fonotaga a Samoa, faafetai.

**FOFOGA FETALAI:** Ia ua faamalo faafetai saunoa i lau afioga i le sui usufono mamalu mai Falealupo, ia o lea lava ua maua lou finagalo ua i ai foi nai fautuaga mo lou itumalo. Ia malo faafetai. O lea foi ua faaalua lou

lagolagoina o le tatou Tala o le Tupe, ia o lea lava ua lagonaina e le tatou Maota. O le mea lea malo faafetai.

Ia matau atu e manatu ua tulalata foi i le tatou malologa. Ia e i ai foi ia le talitonuga ia, ua le o toe toatele foi nisi o tatou o totoe, seivagana ai ia le tatou Komiti. Ia ona o lo o i ai lava nisi o tatou o totoe e sausaunoa, ia ona faatoa tuu atu lea i le Komiti. Ia o lea ua matau atu, ia faafetai tele lava mo le tatou galuega. Matauina lava ma le totoa e le Nofoa ia lo tou lagolago mai i le tatou galuega. Ia o lea lava ua matau atu ia ua tele tatou sui usufono ua sausaunoa e tusa o le tatou Tala o le Tupe. O le mea lea faafetai.

O le agaga lava ia o le faafetai e momoli atu i le paia o le tatou Palemene ona o le sologa lelei o le tatou galuega. Malo le usufono, ia faafetai foi mo saunoaga ma tuleiga o lenei aso. Ia e i ai le manatu taeao aena foi i le aso taeao pe a avatu ai lo outou soifua, ia ona toe faaauau lea o le tatou galuega. Afai foi o le a tatala ia le tatou Maota i lenei itula o le afiafi, ia alofagia e le Atua le afifio atu i aiga i lenei afiafi, tatou talo soifua i le alofa o le Atua mo le aso a taeao e faaauau ai ia le tatou galuega.

E momoli foi le faafetai i le taliuta a Ofisa o Pulega o Matagaluega ma Faalapotopotoga Tumaoti o le tatou Malo, ia faamalo le onosai. I le faafofoga tapuai mai a Samoa ma ona tafa e fia, faamalo tapuai faafetai tatalo. Alofagia e le Atua faigamalologa o lenei afiafi.

Ia ae tatou te le i tolopo, ou te talosaga atu i le sui usufono mamalu mai Satupaitea e saunia se tatou tatalo e faaiu ai ia le tatou Fono.

*Na tolopo Taulumaga a le Fono Aoao Faitulafono i le itula e 9:57 i le po seia aulia le Aso Lulu, 23 o Iuni 2022 i le itula e 9:30 i le taeao.*